



CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE
SEP 15 1933

T 5728/4298



5



廿一史彈詞註卷之八上

成都楊 慎用修編著

漢陽張三異禹木增定

男仲璜別麓註

孫坦驄青御校

第八段 說五代史 定風波

雨汗淋漓赴選場秀才落得甚乾忙白髮漁樵諸事懶
蕭散閒談今古論興亡 虞夏商周秦楚漢三分南北
至隋唐看到史官褒貶處得趣不搖紈扇自然涼

詩曰

山自青青水自流南征北戰幾時休青春壯士邊關
老紅粉佳人白了頭

哈佛大學漢和
圖書館珍藏印

十遇征夫九皺眉忘餐廢寢有誰知中宵破夢兜鈴
舉頓飯驚心戰馬嘶剪髮搓繩穿斷甲拆衣抽線補
殘旗風流宰相龍樓宴翠袖雙扶下玉梯

詩向會家閒講究話逢知己細評論評論往事知賢
否講究前賢說廢興東岸水流西岸響南山風送北
山雲雲容冉冉舒還卷水勢滔滔古又今流水浮雲
何日了人生在世幾回春消磨白髮詩和酒斷送青
春利與名蓋世功名野馬燄掀天事業闡婆城半張
故紙留蹤跡千古漁樵作話文濶論高談依故典長
歌短曲弔英魂就中多少悲歡處珍重相知勿倦聽
說過隋唐三百載一場春夢別翻公案五代史多少興

亡要知去跡來踪閱盡殘篇斷簡按五代者梁唐晉漢
周是也起朱溫終周恭帝凡十三主纔六主善終略談
於後

後梁太祖朱溫本碭山小民為黃巢賊黨力屈降唐後
因有功封梁王賜名全忠弒了唐昭宗自稱皇帝

開平
乾化

在位六年被妾生子郢王朱友珪刺死其第三子均王

友貞討誅友珪

貞明
龍德

又十年唐莊宗滅之共十六年而

亡

唐主李存勖其先朱邪國昌乃沙陀國人有功於唐賜
姓李氏其父李克用封晉王去世之後李存勖滅了梁
國自稱唐主謂之莊宗

同光

在位四年被樂官郭從謙所

弒其義兄明宗即位

天成長興

傳之愍帝

應順

又被義兒潞王

所弒潞王自立三年

清泰

被石駙馬所篡前後四主共十

四年而亡

晉主石敬瑭乃唐明宗駙馬割地臣虜借兵滅唐為晉

高祖

天福

在位七年傳與兄子石重貴

開運

被北番擄入胡

地共十一年而亡

漢高祖劉知遠石晉之臣乘契丹滅晉稱帝

天福

傳子承

佑是為隱帝

乾祐

輕誅功臣被其臣郭威所弒父子共四

年而亡

後周太祖郭威連弒劉承佑劉贊篡漢

廣順

在位三年無

嗣其妻兄之子柴榮襲位是為世宗

顯德

七年而崩子宗

訓即位七月禪位與趙匡口按後周二主二姓共十年

而亡此謂之五代十三君一起一滅五十三年中間又

有僭號之國十一處稱王稱帝賢愚不同

福建閩王王審知唐僖宗時受封據福建統五州傳其

後王延翰王延鈞

龍啓

王延昶

永和

王延曦

永隆

王延政

天德

共六主五十年而降於吳越

吳越國者起錢鏐唐昭宗時受封據兩浙統十三州是

為武肅王

寶正

傳其後文穆王元瓘忠獻王弘佐弘侂弘

俶凡五主八十四年歸降於宋太祖

淮南吳王楊行密唐昭宗時受封據廬州二十八郡號

忠武王傳之威王渥宣王隆演

武義

讓王溥

順義

乾貞

天祚

凡四主共三十六年禪位與南唐

江南唐王李昇本淮南楊氏之臣徐温之義子係唐朝

子孫受吳王封為齊王受楊溥禪位建國金陵稱帝統

三十五州號烈祖傳之子李景是為後主保大宋太祖

乾德二年卒其子李煜嗣位歸宋凡三主共三十九年

而亡

湖南楚王馬殷唐昭宗時為刺史據潭州二十三郡朱

温時受封是為武穆王傳其子希聲希範希廣希萼希

崇凡六主共五十六年南唐後主滅之

荆南秦王高季興梁朱温之臣又降唐降吳受吳封為

秦王據荆南三州傳其後高從誨保融保勗繼冲凡五

主共五十七年降於宋

西川蜀王王建唐僖宗時為利州刺史昭宗時受封後

稱帝據成都四十八州是為高祖武成傳其子

宗行光天共二十五年唐莊宗滅之

後蜀王孟知祥唐明宗時受封據成都三十六州傳其

子景明德共四十年降於宋太祖

北幽燕王劉守光梁太祖時受封後稱帝唐莊宗滅之

廣南漢王劉隱梁太祖時為清海節度使弟劉巖稱帝

據廣南四十七州乾亨大有傳之子玠光天晟乾和乾銀太寶

凡四主共五十五年宋太祖滅之

河東晉主劉崇漢高祖知遠之弟因郭威篡漢遂稱帝

於晉陽謂之北漢世祖傳其子承鈞是為孝和皇帝天會
無嗣先是有營卒薛釗娶世祖女為妻生子繼恩世祖
即位其女居內薛釗自刎世祖以繼恩與孝和為嗣其
母改嫁何氏又生子名繼元亦與孝和為嗣廣運相傳四
主共二十九年宋太祖併之

凡此十一處稱王稱帝者共四十一人

自唐末梁初各各據土僭號至宋太宗太平興國四年
通共八十二年北漢劉繼元歸附之後僭偽盡絕那時
天下生靈受了多少塗炭見了多少干戈今從五代梁
朱溫創始之初說起

按五代始於梁朱溫創首

梁唐晉漢周為五代始朱溫
篡奪唐祚稱帝改國為梁

本碭山無藉子一箇窮民

朱溫宋州碭山午溝里人少孤貧與兄存昱傭食蕭
縣劉崇家崇數笞辱之後稱帝兄全昱曰朱三汝本
碭山一民也從黃巢為盜天子用汝為四鎮節度使
富貴極矣奈何一旦滅唐家三百年社稷他日得無
滅吾族乎宋州今歸德府碭山縣蕭縣俱屬徐州
括地志云宋州碭山縣在州東百五十里碭山在縣
東按今歸德府秦碭郡也

唐之末金色蟆太行造反

唐天僖中有童謠曰金色蝦蟆爭弩眼翻却曹州天
下反後王仙芝果陷曹州黃巢應之巢後攻陷長安
自稱大齊皇帝改元金統太行山在河內山陽縣
西北上黨南又在懷慶府城北二十里山勢綿亘數
千里雖各因地之名其實皆名太行

聚鄉民相接應占據河中

黃巢起曹濮温聚眾應之巢陷京師以温為東南面
行營先鋒使討河中留後王重榮數為重榮所敗温
乃因重榮以同州降都統王鐸表温為河中行營招
討副使後重榮死子珂為河中留後温取河中執珂
殺之奏乞除河中節度諷吏民請
已為帥河中今平陽府蒲州

勢敗也乃降唐獲功受賞

時唐僖宗在蜀以首相王鐸為諸道行營都統會諸
鎮兵討巢進逼長安官軍四集巢勢日蹙號令所行
不出同華温知其將亡遂以華州降唐鐸以温為同
華節度使尋令兼淮南節度使又令為蔡州四面行
營都統進爵東平郡王更拜為宣武宣義天平護國
節度使未幾進爵梁王後又賜號回天再造竭忠守
正功臣同華二州名俱屬
西安府護國即河中今蒲州

賜御名易全忠猛氣兇鋒

唐僖宗賜温名全忠温狙獍兇暴殘忍屠戮顧
氏曰怒鬚仇目奸鋒中人險威震主虎負鷹視

所忌者晉蜀岐皆為勅敵

封魏王加九錫凡肉唐宗

初全忠為宣武節度使李克用為雁門節度使王建
為西川節度使李茂貞為鳳翔節度使各擁強兵屢
相攻戰唐昭宗封克用爵晉王建蜀王茂貞岐王全
忠梁王後全忠弒昭宗而立昭宣帝急於傳禪密使
蔣元暉等謀之元暉以魏晉以來皆加九錫殊禮然
後受禪全忠曰汝曹巧述閑事以沮我借使我不受
九錫豈不能作天子耶元暉曰唐祚已盡天命歸王
但以晉蜀岐皆吾勅敵王遽受禪彼心未服不可不
曲盡義理然後取之元暉歸謀於柳璨等乃以全忠
為相國總百揆進封魏王加九錫全忠怒不受綱目
曰温視唐宗猶枕上之肉惟所
烹醢耳宣武軍名今開封府

效推戴張文蔚蘇循李振

初元暉等議加全忠九錫朝士多憤色唐禮部尚書
蘇循揚言曰梁王功業顯大曆數有歸朝廷宜速行
揖讓朝士無敢違者後昭宣帝禪位於梁遣宰相張
文蔚及循與御史大夫薛貽矩等奉冊寶如梁全忠
遂稱帝文蔚等舞蹈稱賀全忠舉酒勞之曰此皆諸
公推戴之力也文蔚慚伏獨循與貽矩盛稱功德以

為應天順人
李振註見下

弒昭宗假啼哭無樣欺心

判官李振為全忠心腹每自汴至洛朝臣必有竄逐者時謂之鴟梟全忠欲立幼君易謀禪代遣振至洛陽與蔣元暉及朱友恭氏叔琮等圖之振遂與元暉謀夜弒昭宗於椒殿全忠聞之陽驚哭曰奴輩負我令我受惡名於萬代至東都伏梓宮慟哭殺友恭叔琮友恭臨刑大呼曰賣我以塞天下之謗如鬼神何

服袞冕篡唐朝改名朱晃

初張文蔚等率百官勸進全忠更名晃文蔚奉冊寶至金祥殿晃遂披袞冕即位是為後梁太祖

夾寨戰幽州戰眉蹙難伸

梁遣康懷貞攻晉潞州晉李嗣昭閉城拒守懷貞攻之不克乃築壘穿塹守之內外斷絕晉遣周德威救之壁於高河懷貞擊之大敗梁遣李思安伐之更築重城內以防奔突外以拒援兵謂之夾寨時相持逾年會晉王克用卒子存勗立與諸將謀曰朱溫所憚者先王耳聞吾新立必有驕怠之心若出其不意破

之必矣乃帥兵直抵夾寨填塹燒寨鼓譟而入梁兵潰走潞州圍解晃聞之驚歎曰生子當如李亞子克用為不亡矣晉師伐幽州燕王劉守光求救於梁晃自將救之進圍蓟縣晉將李存審引兵扼下博橋使史建塘李嗣肱分道擒生遇梁軍之樵芻者皆執之獲數百人殺之留數人斷臂縱去曰語朱公晉王大軍至矣建塘嗣肱各將三百騎效梁軍旗幟服色與樵芻者雜行暮至營內縱火大譟營中大擾斷臂者復來曰晉軍大至矣晃大駭燒營夜遁委棄資械不可勝計既而復遣騎覘之曰晉軍實未來此乃史先鋒遊騎耳晃慚憤遂病顧氏曰夾寨之戰鋒摧銳沮柏鄉之戰挫眾損師幽州之戰收迹遠遁鬱鬱然填恨低首常不伸眉 蓟縣故城在河間府景州城內下博縣名今省入真定府深州德威字鎮遠馬邑人

預料著自死後身無葬地

晃還至洛陽疾甚謂近臣曰我經營天下三十年不意太原餘孽更昌熾如此吾觀其志不小天復奪我年我死諸兒非彼敵也吾無葬地矣因哽咽絕而復蘇

縱淫邪私子婦狗行狼心

晃長子柳王友裕早卒次假子博王友文留守東都
次鄧王友珪為控鶴指揮使次均王友貞為東都指
揮使晃恣意淫邪諸子在外常徵其婦入侍友文婦
王氏色美晃尤寵之
昌府郢今武昌府
均州名屬襄陽府
柳今湖廣柳州博今山東東

朱友珪高聲罵老賊萬段

友作為天報應寢殿尸橫

晃疾甚命王氏召友文欲付以後事友珪婦張氏知
之密告友珪友珪遂入左龍虎軍見統軍韓勅相與
合謀以牙兵從友珪襟控鶴士中夜斬關入至寢殿
晃驚起曰我固疑此賊憾不早殺之友珪曰老賊萬
段友珪僕夫馮廷諤以劍刺晃洞其腹刃出於背以
敗擅裏之瘞於寢殿友珪遂即位尹氏曰朱溫篡唐
其兇暴悖逆世所未有溫既能以臣弑君故友珪
亦能以子弑父其屠戮之慘皆天理昭昭之報也

朱友貞討逆賊誅兄報父

梁駙馬都尉趙巖晃之壻也奉使至大梁均王友貞
密與謀誅友珪巖曰此事成敗在楊令公時楊師厚

為天雄節度使宿衛勁兵多在麾下友貞乃遣心腹
說之師厚謀之將佐或曰郢王親弑君父賊也均王
舉兵復讐義也厚乃使其將王舜賢至洛陽陰與晃
甥龍虎統軍袁象先謀巖歸亦與象先定計遂帥禁
兵突入宮中友珪令馮廷諤先殺妻後殺已廷諤亦
自殺友貞遂即位於大梁是為梁末帝
天雄軍名
今大名府

寵張趙任段凝闇弱無能

德妃張氏卒將葬康王友敬使人於寢殿作亂執誅
之友貞由是疎忌宗室寵任趙巖及妃兄弟漢鼎漢
傑從兄弟漢倫等咸居近職弄權賣爵政事日紊段
凝附張趙每出兵必使為監副捷奏至張趙悉歸
功於凝凝重賂之求為招討使由是將士憤怒後梁
將康延孝奔唐唐主存勗問以梁事延孝曰梁主闇
懦張趙擅權段凝智勇俱無專斂行伍以奉權貴願
陛下養勇蓄力直抵大梁擒其偽主天下定矣
今肇慶府
德慶州

棄敬翔罷劉鄩一時智勇

平章敬翔深沉有智略從晃用兵三十年細大之務必關之及友貞立趙巖等用事翔每進言皆不聽後梁盡失河北翔曰國家疆土日蹙臣雖憊矣受國恩深願得自效巖等以翔有怨言遂棄不用後唐軍且至友貞遽呼翔曰朕居常忽卿言今急矣將若之何翔泣曰臣雖為相實朱氏老奴事陛下如郎君前後獻言陛下不用致有今日雖良平復生誰能為陛下計者及唐軍入翔遂自縊鎮南軍節度使劉鄩好兵書有機畧唐主存勗嘗曰劉鄩用兵一步百計後與存勗相持於莘縣友貞以書責戰鄩報曰晉兵甚銳未易輕也友貞怒鄩曰主暗臣諛將驕卒惰吾不知死所矣後河朔皆入於唐罷鄩為亳州團練使段凝素惡鄩乃譖之罷鄩歸洛陽酈殺之莘縣屬東昌府亳州屬鳳陽府敬翔同州人

王鐵鎗好男兒豹死留名

招討使王彥章驍勇絕倫每戰用二鐵鎗皆重百觔一置鞍中一在手所向無前軍號王鐵鎗先是以段凝趙巖之譖罷彥章還第及唐兵攻兗州乃召用之是時梁之勝兵皆屬段凝京師祇有保鑾五百騎以屬彥章至遞坊戰敗退保中都又敗彥章死戰唐將夏魯奇識其語音曰王鐵鎗也舉稍刺之彥章傷重

馬蹟遂被擒唐主存勗惜之賜藥以傅其創彥章不知書常為俚言謂人曰豹死留皮人死留名存勗屢遣人誘諭之彥章曰臣與皇帝血戰十餘年今兵敗力窮不死何待豈有朝為梁將暮為唐臣遂見殺中都今兗州府汶上縣

李亞子大兵來號咷乞命

李克用病篤命立其子存勗為嗣謂其弟克寧曰以亞子累汝亞子存勗小字也王彥章嘗謂人曰李亞子鬪雞小兒何足畏至是唐兵至曹州梁守將皆降友貞聞彥章就擒唐軍且至聚族而哭召羣臣問策皆莫能對置傳國寶於卧內左右竊之以迎唐軍友貞惟日夜號哭不知所為曹州屬兗州府

皇甫璘揮短劍了當殘生

友貞謂指揮使皇甫璘曰吾不能自裁卿可斷吾首璘泣曰臣為陛下揮劍死唐軍則可矣不敢奉此詔友貞曰卿欲賣我耶璘欲自刎友貞持之曰與卿俱死璘遂弒友貞因自殺

父共子十七年風燈草露

梁太祖末帝父子共十七年

被唐朝追貶做小可凡民

唐毀梁宗廟追廢朱晃友貞為庶人

唐家者乃唐朝沙陀降將

李國昌子克用赴難朝廷

李國昌本名赤心其先號朱邪蓋出於西突厥至其後世別自號曰沙陀而以朱邪為姓唐懿宗時赤心以有功拜振武節度使賜姓名曰李國昌子克用為沙陀副兵馬使唐僖宗乾符中克用殺大同防禦使段文楚自為留後僖宗乃拜國昌為大同節度使國昌欲父子并據兩鎮得制書毀之殺監軍與克用合兵擊寧武及岢嵐軍盧龍節度李可舉討敗之國昌父子亡走鞑鞞黃巢陷長安朝廷赦之遣李友金召之克用始將沙陀兵趨河中赴難長安僖宗以為雁門節度使後封晉王至唐為朱溫所滅克用率長子存勗嗣位遂稱帝國號亦曰唐是為後唐朱邪處月之別種西突厥苗裔世居金婆山之陽蒲類海東

其地有大磧名沙陀後因以沙陀為號以朱邪為姓

振武軍名今大同府寧武故址在大同府朔州南岢嵐軍今為州屬太原府

獨眼龍破黃巢功居第一

克用一目微眇時人謂之獨眼龍與黃巢戰於渭南一日三捷巢敗走克用遂入京師時克用年二十八於諸將最少破黃巢復長安功第一諸將皆畏之

與朱溫劈廝對屢次交兵

克用屢敗巢兵追巢至於宛句巢遁走克用還過汴州朱溫館於上源驛克用乘酒使氣溫不平克用醉卧溫發兵圍驛攻之左右以水沃其面而告之克用始張目援弓而起會大雨震電克用隨電縋城得出還太原訟於京師請加兵於汴僖宗詔和解之克用由是不平與溫互相攻伐兵連不已

憤逼京負罪愆群奸挑激

僖宗光啓元年河中王重榮與宦者田令孜有隙徙重榮兗州以王處存為河中節度使詔克用以兵護

處存之鎮重榮使人給克用曰天子詔重榮俟克用
至與處存共誅之因僞為詔書示之曰此朱溫之謀
也克用信之八上表請討溫皆不許克用愈怒僖宗
以重榮不徙兗州遣邠州王玫鳳翔李昌符討之玫
等亦陰符於溫欲朝廷討克用數遣人潛入京城燒
積聚殺近侍聲云克用所為會重榮告急於克用克
用遂以兵赴之與玫等戰於沙苑大敗之遂進逼京
城令玫奉僖宗奔鳳翔克用退屯河中表請還宮因
罪狀令玫請誅之令玫復劫駕至興元克用
遂還太原沙苑地名在西安府朝邑縣南

誓一生無改節義士忠臣

西川王建謀稱帝遺克用書曰請各帝一方俟朱溫
既平乃訪唐宗室立之退居藩服克用復書云誓於
此生靡敢失節因語子存勗曰昔天子幸石門吾發
兵誅賊臣當是時吾若挾天子據關中自作九錫禪
文誰能禁我顧吾家世忠孝立功帝室誓死不為耳
石門鎮名惟西安府淳化縣北有石門山又平涼
府靜寧州南有石
門峽未知孰是

李存勗承王位雪仇三矢

克用卒子存勗嗣位為晉王初克用臨終以三矢賜
存勗曰梁吾仇也燕王吾所立契丹背約歸梁三者
吾遺恨也與汝三矢無忘父志存勗藏之廟用兵請
矢盛以錦囊負而前驅後存勗果繫燕王劉守光父
子孟梁朱友貞君臣
之首入太廟還矢焉

滅仇梁繼唐統氣槩豪英

唐天祐二十年存勗自立為帝仍廟祀高祖太宗懿
宗昭宗以下上繼唐統國號曰唐是為後唐莊宗是
年梁數道入寇存勗召諸將會議郭崇韜曰梁今以
精兵授段凝凝非將材不足畏陛下若留兵守魏固
保楊劉自以精兵長驅入汴彼城中空虛必望風潰
矣存勗遂以大軍濟河至鄆州遇梁兵敗之追至中
都圍之梁兵潰擒梁將王彥章亟趨大梁梁主友貞
自殺段凝降梁遂滅先是克用謂存勗此子志氣遠
大必能成吾事歐陽修五代史曰方其繫燕父子以
組函梁君臣之首入廟還矢其意氣之盛可謂壯哉
魏今大名府楊劉城名今東阿縣
楊劉鎮是鄆州今兗州府鄆城縣

張承業一片心忠言逆耳

單詞全卷八 上

辜負了老勅使早自稱尊

初唐天祐十八年存勗謀稱帝魏州僧得傳國寶獻之將佐皆賀監軍使張承業諫曰吾王世世忠於唐室所以老奴三十餘年為王拮拾財賦名補兵馬誓滅逆賊復本朝宗社耳今元兇未滅而遽即大位殊非王父子之初心王何不先滅朱氏求唐後而立之使唐之子孫在孰敢當之使唐無子孫天下之士誰與王爭者臣唐家一老奴耳誠願見大王之成功然後身遂田里使百官送出洛東門令路人指曰此本朝敕使先王時監軍也豈不臣主俱榮哉存勗曰此非余所願奈羣下意何承業知不可止乃仰天大哭曰諸侯血戰本為唐家今王自取之誤老奴矣即歸太原不食而卒時年七十有七 承業字繼元 憲僖宗時宦者昭宗以為監軍

堪憾處志驕盈矜功十指

荆南節度使高季興入朝及歸謂將佐曰新朝百戰方得河南乃對功臣舉手云吾於十指上得天下矜伐如此誰不解體吾無憂矣吳嚴可求亦謂徐温曰聞唐主始得中原志氣驕滿不出數年將有內變但

保境安民以待之耳 荆南軍名今荆州府

侮縉紳悅女色寵任伶倫

存勗自滅梁之後漸恣荒淫命伶人景進采擇民女三千餘人以充後庭尤寵任伶人出入宮掖侮弄縉紳羣臣憤激莫敢出聲四方藩鎮爭以賄賂結之其尤蠹政害人者景進好采閭閻鄙細事以聞存勗委以耳目由是干預政事施其讒慝將相大臣皆憚之

李天下壞名聲甘心下賤

存勗幼善音律或時自傅粉墨與優人共戲於庭以悅所寵劉夫人優名謂之李天下嘗自呼曰李天下李天下優人敬新磨遽前批其頰存勗失色新磨徐曰理天下者只有一人尚誰呼耶存勗悅厚賜之

得蜀驕輕屠膾汗馬功勳

唐遣魏王繼岌及侍中郭崇韜伐蜀崇韜入散關倍道而進王承捷以鳳興文扶四州迎降餘城鎮皆望風款附進逼成都蜀主衍降梁震謂李高興曰唐主得蜀益驕亡無日矣時崇韜在蜀與宦者向延嗣有

隙延嗣歸譖之存勗怒復遣宦者馬彥珪詣成都曰
崇韜若有遷延跋扈之狀則與繼岌圖之劉后復自
為教與繼岌令殺崇韜彥珪至蜀繼岌遂如教殺之
并殺其諸子時護國軍節度使朱友謙入朝伶人景
進譖之亦見殺并詔李紹奇滅其家由是天下莫知
崇韜等之罪人情疑駭李紹琛怒謂諸將曰國家南
取大梁西定巴蜀皆郭公之謀而吾之功至於與國
家犄角以破梁則朱公之今朱郭皆無罪族滅行及
我矣紹琛所將多河中兵河中將焦武等號哭於軍
門曰西平王何罪闔門屠膾我輩歸則同誅決不復
東矣遂俱反於蜀顧氏曰泮馬勳臣闔門屠膾而失
功臣之心鳳今鳳縣興今興安州俱屬漢中府文
今文縣扶故址在文縣西屬鞏昌府護國軍今
平陽府蒲州西平王郭崇韜追謚為西平王

登高歎石橋悲彷徨四顧

趙在禮作亂遣歸德節度使李紹榮詣鄴都招諭不
從乃命成德節度使李嗣源討之軍士劫嗣源入鄴
欲與俱反嗣源奔相州紹榮奏嗣源叛與賊合嗣源
上章自理皆為紹榮所遏嗣源疑懼遂引兵據大梁
紹榮請存勗幸關東招撫存勗遂發洛陽至萬勝鎮
聞嗣源已據大梁諸軍離叛登高歎曰吾不濟矣即

命旋師至石橋西置酒悲泣遂入洛陽歸德軍即
德府相州亦即歸德鄴郡五代唐所置今大名府

郭門高下毒手樂器焚身

伶人郭從謙以有功得寵為從馬直指揮使郭崇韜
方用事從謙以叔父事之及崇韜死從謙數以私財
享諸校對之流涕言崇韜之冤從馬直軍士王温等
五人遂作亂擒斬之存勗戲謂從謙曰汝既負我附
崇韜又教王温反欲何為也從謙懼退謂諸校曰主
上以王温之故俟鄴都平定盡阮若曹由是親軍皆
不自安從謙遂定計帥所部兵攻興教門存勗聞變
帥衛兵擊之時亂兵已緣城而入近臣宿將皆釋甲
潛遁存勗為流矢所中鷹坊人善友扶至絳霄殿廡
下抽矢渴滿須臾遂殂善友斂樂器覆屍而焚之
郭從謙優名郭門高

唐明宗李嗣源胡人異姓

勇鬪戰屢建功養子螟蛉

李嗣源本胡人無姓氏初名邈佶烈以騎射事克用
屢立戰功克用養以為子賜名李嗣源及莊宗被弑

諸將立以為帝
是為唐明宗

討鄴都軍士謹身為擁立

初存勗使嗣源討趙在禮於鄴都嗣源下令詰旦攻城是夜從馬直軍士張破敗帥眾大譟焚營嗣源叱而問之對曰將士從主上十年百戰以得天下今主上棄恩任威云克城之後當坑魏博軍我輩初無叛心但畏死耳今欲與城中合勢請主上帝河南令公帝河北嗣源泣諭不從遂劫入城在禮帥諸校迎拜嗣源詭以出城收兵奔相州上表自理為李紹榮所遏嗣源不得已遂遣石敬瑭以兵入據大梁

入洛陽監國政志在經綸

嗣源至罌子谷聞存勗被弒乃慟哭入洛陽止於私第百官勸進嗣源曰吾奉詔討賊不幸部曲叛散欲入朝自訴又為紹榮所隔披猖至此諸軍見推殊非相悉後百官三上牋請嗣源監國乃許之

遠女色減中宮英明有道

時宣徽使選後宮美少者數百獻之嗣源曰奚用此為對曰宮中職掌不可闕也嗣源曰宮中職掌宜諸

故事此輩安知乃悉用老舊者量留後宮百人宦官三十人又除稅省耗及罷四節貢奉

惜生民休士馬五穀豐登

嗣源在位八年兵革罕用年穀豐登蔚代緣邊粟斗不過十錢較於五代粗為小安

夜焚香禱蒼天早求誕聖

嗣源每夕於宮中焚香祝天曰某胡人因亂為眾所推願天早生聖人為生民主

只末年諱儲嗣激喪從榮

太僕少卿何澤表請立秦王從榮為太子嗣源不悅私謂左右曰羣臣請立太子朕當歸老太原舊第耳議遂止從榮驕矜不為時論所與心忌宋王從厚嘗懼不得為嗣至是嗣源寢疾從榮入問疾嗣源俯首不能舉從榮出開宮中皆哭意父已歿乃謀以兵入宮宣徽使孟漢瓊入白曰從榮反兵已攻端門矣嗣源指天泣下謂侍衛指揮使康義誠曰卿自處置控鶴指揮使李重吉從珂之子也時侍側嗣源曰爾亟以兵守諸門重吉即以控鶴兵守宮門是日從榮自河南府擁兵千人以出陳兵天津橋北使人召義誠

而端門已閉叩左掖門亦閉漢瓊使馬軍指揮使朱洪實帥騎討從榮從榮潰走歸府皇城使安從益進斬之

唐愍帝恰臨朝時衰運拙

宋王從厚明宗第五子時為天雄節度使從榮伏誅遣孟漢瓊召從厚於鄴至是即位是為愍帝

李從珂王氏子反入西京

李從珂本姓王氏小字阿三鎮州平山寡婦魏氏之子嗣源掠得之養以為子名曰從珂時為鳳翔節度使朝廷徙之河東從珂遂於鳳翔舉兵反從厚以康義誠為招討使將兵拒之從珂至陝諸將及義誠皆降從厚遂出奔衛州從珂入洛陽廢從厚為鄂王而自立鎮州今真定府平山縣名屬真定府衛州今衛輝府鄂州今武昌府

辭鴆酒用麻繩哀哉短命

衛州刺史王弘贄遷從厚於州解從珂遣弘贄之子巒往鴆之從厚不飲巒縊殺之

一家兒妻共子總做冤魂

從厚出奔妃孔氏病四子俱幼不能從從珂俱殺之

唐潞王篡李氏戕民賞衆

從珂初封潞王弒從厚自立國號亦曰唐是為唐廢帝初從珂發鳳翔許軍士以入洛人百緡既至閱實府庫金帛不過三萬兩而賞軍之費計應用五十萬緡三司使王玫請率京城民財以足之數日僅得數萬緡執政請據屋為率無問士庶自居及儻者預借五月儻直從之

除菩薩扶生鐵變了人心

是時有司百方斂民財及竭左藏舊物與諸道貢獻乃至后妃器服簪珥纔二十萬緡從珂患之學士李專美曰財力盡於此矣宜據所有均給之乃詔禁軍在鳳翔歸命者賜錢七十緡至二十緡在京者各十緡軍士無厭怨望曰除去菩薩扶立生鐵以愍帝仁弱從珂剛嚴有悔心故也

卜春節歸反疑漏言公主

不隄防石駙馬引動番兵

河東節度使石敬瑭初尚明宗女永寧公主為駙馬
都尉從珂忌之至是以千春節置酒公主上壽畢辭
歸晉陽從珂醉曰何不且留遽歸欲與石郎反耶敬
瑭疑懼欲嘗從珂之意表陳羸疾乞移他鎮從珂遂
徙為天平節度使敬瑭謀於將佐曰吾之來河東也
主上面許我終身不除代今忽有是命得非如今年
千春節與公主所言乎掌書記桑維翰曰公明宗愛
婿主上以反逆見待此非首謝可免但力為自全之
計契丹主素與明宗約為兄弟公誠能屈節事之朝
呼夕至何患不成敬瑭遂拒命從珂遣張敬達等討
之敬瑭遣使求救契丹契丹主德光將兵赴援與唐
騎將符彥卿等合戰敬瑭遣都押衙劉智遠助之唐
兵大敗契丹遂以敬瑭南下復破唐兵於團柏敬瑭
遂直趨洛陽所在將校皆降天平軍名今兗州府
東平縣團柏唯潞州城北有柏谷山又太原
府祁縣境東有團柏鎮維翰字國僑河南人

一炬火元武樓化成灰燼

時敬瑭將至從珂與曹太后劉皇后及雍
王重美等攜傳國寶登元武樓自焚死

十三年傳四主急雨殘雲

唐自存勗至從珂凡四
主共十三年而後唐亡

廿一史彈詞註卷之八上

廿一史彈詞註卷之八

第八段下

石駙馬滅殘唐更稱後晉

石敬瑭西夷臬揆雞之子為唐明宗駙馬借兵契丹滅唐契丹立為大晉皇帝是為後晉高祖

拜契丹為君父做小甘心

初石敬瑭令桑維翰草表稱臣於契丹且請以父禮事之約事捷之日割盧龍一道及雁門關以北諸州與之劉智遠曰稱臣可矣以父事之太過厚以金帛賂之不必許以土地敬瑭不從表至契丹大喜許以

傾國赴援

山前後十六州長淪左衽

敬瑭既即位遂割幽薊瀛莫涿檀順新媯儒武雲應寰翔蔚山前山後共一十六州以與契丹從此諸州淪於左衽者凡四百三十二年歐陽公塞垣論漢唐之世東自遼海碣石榆關漁陽盧龍飛狐雁門雲中

馬邑定襄西抵五原朔方諸郡每匈奴犯境據險而
出奇持重而待外寇晉高祖以幽薊山後諸郡為耶
律之壽自滄海乾寧雄霸順安廣信由中山距并代
自茲關東無復關險故契丹奄有幽陵遂絕古北之
隘徑度常山陵獵全魏矣幽今順天府薊屬順天
府瀛今河間府莫故城在河間府任邱縣北涿今涿
州檀今密雲縣順今順天府順義縣新今保安州媯
今延慶府儒一統志云永樂中改為隆慶州直隸京
師武一統志云禹貢冀州之域今置萬全都指揮使
隸京師雲即雲中今大同府寰今馬邑縣應翔蔚三
州俱屬大同府

兒皇帝被呼喚羞辱難聽

敬瑭事契丹甚謹奉表稱臣尊契丹主為父皇帝每
契丹使至即於別殿拜受詔敕朝野咸以為耻敬瑭
事之曾無倦意後契丹主屢止敬瑭上表稱臣但
令為書稱兒皇帝契丹亦報稱兒皇帝如家人禮

為招納吐谷渾番王責怪

一場憂一場氣染病亡身

敬瑭割雁門之北以賂契丹由是吐谷渾皆屬契丹
苦其貪虐思歸中國成德節度使安重榮復誘之於
是率部落來奔契丹大怒遣使來讓敬瑭逐之使還
故土吐谷渾由是附於重榮重榮執契丹使拽刺表
稱吐谷渾等願與晉兵擊契丹敬瑭患之泰寧節度
使桑維翰密疏曰陛下免晉陽之亂而有天下契丹
之功也今重榮恃勇輕敵吐谷渾假手報仇皆非國
家之利不可聽也敬瑭謂使者曰朕比日以來煩懣
不決今見卿奏如醉醒矣乃憂重榮跋扈以劉智遠
為北京留守智遠以親將郭威以詔指說吐谷渾酋
長白承福令去重榮歸朝廷承福遂帥眾歸智遠智
遠徙之內地處之太原嵐石之地表領大同節度使
契丹以晉招納吐谷渾遣使
責讓敬瑭憂悒成疾遂崩

將幼子託非人老奸馮道

馮道時守司徒兼侍中敬瑭寢疾道獨侍敬瑭命幼
子重睿出拜之又命宦者抱置道懷中欲道輔立之
道少為劉守光參軍後為河東判官事唐莊宗為翰
林學士相明宗愍帝廢帝晉高祖封魯國公出帝朝
封燕國公契丹滅晉事德光為太傅入漢為太師入
周為太師中書令贈瀛王歷事四姓十二君滑稽多

智浮沉取容累朝不離將相公師之位自著長樂老
敘數百言述已所歷階勳官爵以為榮司馬公曰道
尊寵冠三師權任首諸相國存則竊位素餐國亡則
迎謁勸進茲乃奸臣之尤者也胡氏曰馮道可不謂
之老奸宿猾乎

立齊王為國主又是昏君

敬瑭殂道與侍衛馬步都虞侯景延廣議以國家多
難宜立長君乃立敬瑭兄敬儒之子齊王重貴嗣位
是為晉出帝重貴寵任延廣擅挑強敵且廣置宮
室厚賞伶優括民財穀虐政頻仍卒為契丹所據

妻叔母戲梓宮自稱新壻

醉醺醺涎鄧鄧敗壞人倫

初敬瑭愛少弟重口養以為子娶馮濛女為其婦重
口早卒馮夫人寡居有美色時敬瑭梓宮在殯重貴
納之與夫人酣飲過梓宮前酪而告曰皇太后之命
與先帝不任大慶左右失笑重貴亦笑顧左右曰我
今日作新壻句如夫人與左右皆大笑遂立為后後
契丹入寇暴重貴之惡曰納叔母於宮中亂人倫之

大
典

景延廣橫磨劍突冲番國

翁怒來天奪鑿倖捷陽城

重貴初立大臣議奉表稱臣告哀於契丹景延廣請
致書稱孫而不稱臣契丹遣使責讓延廣復以不遜
語答之且執契丹使喬榮囚之大臣皆言契丹不可
負乃釋之榮辭歸延廣大言曰歸語而主先帝為北
朝所立故稱臣奉表今上乃中國所立所以降志於
北朝者正以不敢忘先帝盟約耳為鄰稱孫足矣翁
怒則來戰孫有十萬橫磨劍足以相待也契丹主大
怒遂入寇後晉遣招討使杜威都排陳使符彥卿等
攻契丹泰州降之契丹主擁眾南向威等懼退至陽
城契丹至晉軍與戰逐北十餘里契丹踰白溝而去
晉軍結陣而南至白團衛村契丹四合圍之數重絕
糧運汲道是日東北風大起契丹順風縱火李守貞
曰彼眾我寡風沙之內莫測多少此風天助我也與
符彥卿皇甫遇等引精騎擊之風勢益甚昏晦如夜
彥卿等橫衝契丹呼聲動天地契丹大敗而走勢如
崩山契丹主獲一橐駝乘之而走後契丹兵入大梁

單司主

三

汝所為也十萬橫磨劍安在乃鎖之延廣自殺顧充
曰陽城一捷是天奪之鑿而益其疾也 秦州今保
定府白溝河名在真定府高邑縣南封邱縣名屬開
府封

定關南平塞北誇張大話

晉遣杜威等將兵伐契丹下敕榜曰專發大軍往平
點虜先收羸莫安定關南次復幽燕盪平塞北有能
擒獲虜主者除上鎮節度使 羸莫幽燕註見前
關南謂瓦橋關以南十縣及晉陽之地皆曰關南

胡兵入將帥叛運盡神昏

晉初議北征以杜威為元帥李守貞副之趙瑩知其
有異志曰杜公國威貴為將相而所欲未厭豈可復
假以兵權不若止任守貞不從威屢請益兵由是禁
兵皆在麾下宿衛一空及契丹大舉入寇以兵環晉
營威守貞朱彥筠等皆叛降契丹威引契丹主至恒
州順國節度使王周亦降高行周符彥卿皆詣契丹
降契丹以威為太傅守貞為司徒所過州縣威皆諭
降之重貴召范質草降表自稱孫男臣重貴禍至神

惑運盡天亡今與太后
及妻馮氏面縛待罪

張彥澤兩頭蛇爭先奪國

初契丹入寇趣恒州馬軍都排陣使張彥澤等在恒
州引兵會杜威言契丹可破之狀重威復趣恒州以
彥澤為前鋒威潛遣腹心詣契丹約降契丹引兵南
威將降兵以從遣彥澤將騎先取大梁彥澤倍道疾
驅夜渡白馬津自封邱門斬關而入重貴於宮中起
火自携劍驅後宮赴火俄而彥澤傳契丹書慰撫之
重貴乃命滅火與后妃聚泣使召彥澤微笑不應遷
重貴於開封府頃刻不得留重貴悉以內庫金珠自
隨彥澤曰此物不可匿也乃分以遺彥澤彥澤遣指
揮使李筠以兵守之内外不通彥澤縱兵大掠二日
都城為之一空自謂有功於契丹旗幟皆題赤心為
主見者笑之 恒州今真定府封邱門汴京城門名
也

孫勿憂有噉所委骨窮塵

契丹主賜重貴手詔曰孫勿憂必使汝有噉飯之所
封為負義侯徙之黃龍府而後晉亡顧氏曰生也負

名負義死也委骨窮塵黃龍府即慕容氏和龍城也在契丹臨潢府東南

劉智遠晉節度徘徊視亂

劉智遠其先沙陀人在晉為河東節度使封北平王晉主重貴忌之以為北面行營都統智遠廣募士卒又得吐谷渾財畜由是富強晉主與契丹結怨智遠知其必危而未嘗論諫契丹屢深入智遠初無邀遮入援之志晉主嘗再命智遠會兵山東皆不至晉主曰太原殊不助朕必有異圖及契丹入汴智遠分守四境遣王峻奉表稱臣契丹賜詔褒美親加兒字於智遠姓名之上既而知其觀望不至使謂智遠曰汝不事南朝又不事北朝意欲何所俟耶峻言契丹貪殘不能久有中國勸智遠進取智遠曰契丹未有他變豈可輕動且觀其所利止於得財貨必將北去宜待其去然後取之

幸遼君胡馬退趨勢稱尊

契丹既入大梁下制稱大遼會同十年將晉主北遷劉智遠聲言出師迎歸晉陽軍士皆曰今天下無主宜先正位然後出師智遠遂稱帝於晉陽後契丹北還智遠入大梁諸鎮皆降乃改國號曰漢更名嵩是

高祖

史弘肇軍令嚴安行入汴

侍衛指揮使史弘肇沈毅寡言御衆嚴整將校小不從命立搃殺之士卒所過犯民田及繫馬於樹者皆斬軍中惕息莫敢犯令所向必克智遠自晉陽安行入洛及汴兵不血刃者皆弘肇之力也

殺許王李從益聞者酸心

唐明宗子許王李從益年尚幼石敬瑭即位李后係明宗女養從益於宮中奉明宗王淑妃如事母封從益為郇公奉唐妃居洛陽趙延壽娶明宗女淑妃詣大梁會禮契丹主見而拜之曰吾嫂也以從益為許王復歸於洛至是契丹北還其將蕭翰為宣武節度使聞智遠擁兵而南欲北歸乃矯契丹主命立從益為帝於大梁淑妃泣曰吾母子單弱如此而為諸公所推是禍吾家也翰留燕兵千人為從益衛而行從益遣使奉表稱臣迎智遠仍出居私第智遠至洛陽命鄭州防禦使郭從義先入大梁殺從益及淑妃淑妃且死曰吾兒何罪而死何不留之使每歲寒食以一盂麥飯灑明宗陵乎聞者泣下

猗氏縣故址在平陽府西南鄭州屬
開封府明宗陵在河南府城東北

稱天福於晉亡何煩憶念

天福晉高祖年號智遠曰余未忍忘晉又
惡重貴開運之名乃更稱天福十二年

原赦了杜重威怎服羣情

初重威將兵禦契丹日置酒作樂罕議軍事指揮使
王清與契丹戰威不遣一騎助之清謂其衆曰上將
握兵坐觀不救此必有異志吾輩當以死報國耳清
與士衆力戰盡死威潛遣腹心詣契丹牙帳邀求重
賞契丹給之曰趙延壽威望素淺不能帝中國汝果
降當以汝爲帝威喜伏甲召諸將出降表示之諸將
駭愕聽命命軍士出陣於外親諭之降命釋甲皆慟
哭聲震原野威更於衆中揚言主上失德信姦忌已
聞者切齒契丹遣延壽衣赭袍至晉營亦以赭袍衣
威其寔皆戲之耳及契丹北還威自以附契丹負中
國內常疑懼智遠徒爲歸德節度使威拒命智遠以
高行周爲招討使討之威出降智遠赦之以爲太傅
每出入路人皆擲瓦礫詬之重威
即杜威因避齊王重貴諱故改名

子承祐嗣其傳謂之隱帝

智遠殂子周王承祐
嗣位是爲後漢隱帝

毛錐文鎗劔武忿族強臣

時契丹入寇議以郭威爲鄴都留守督諸將備之侍
衛指揮使史弘肇欲威仍領樞密使而怨平章蘇逢
吉異議既而朝貴會飲弘肇舉大觴屬威厲聲曰昨
日廷議一何同異逢吉與平章楊邠亦舉觴曰是國
家之事何足介意弘肇又厲聲曰安定國家在長鎗
大劍安用毛錐三司使王章曰無毛錐則財賦何從
可出自是將相有隙如水火矣承祐自即位以來邠
總機攻威主征伐弘肇典宿衛章掌財賦以是國家
麓安後左右嬖倖浸用事邠等屢裁抑之承祐亦厭
爲大臣所制邠弘肇嘗議事於前曰陛下當禁聲有
臣等在承祐積不能平左右因譖之承祐遂謀誅邠
等入白李太后太后不可承祐忿曰國家之事非閨
門所知拂衣而出時弘肇與邠章入朝殿中甲士出
殺之分遣使收捕邠等親黨盡殺之又遣供奉官孟
業賈密詔詣邠令指揮使郭崇威曹
威殺郭威旋族威家嬰兒無免者

郭雀兒舉兵來支撐不住

郭威微時刺其項上為飛雀人皆稱為郭雀兒至是威得詔乃召郭崇威及諸將告以卻等寃死及有密詔之狀崇威等勸威入朝自訴蕩滌鼠輩以清朝廷乃留其養子榮鎮鄴自率兵還朝承祐聞威至河上悔恨私謂寶貞曰屬者亦太草草遣慕容彥超拒之彥超敗奔兗州

孤另另一騎馬死在荒村

初彥超以大軍屯七里店承祐自出勞軍及彥超敗承祐獨與三相及從官數十人宿於七里塞餘皆逃潰旦日將還宮至元化門權知開封府劉錫在門上射承祐左右承祐回轡西北獨行至趙村追兵已至承祐下馬入民家為亂兵所殺
璜按承祐之死五代史云郭允明反殺帝於趙村通鑑云入民家為亂兵所殺劉恕云郭威兵弑帝諱之因允明自殺乃歸罪耳三說不同並附於此以俟讀史者尚論焉

李太后自臨朝纔方一月

李太后高祖后也郭威請立嗣君乃議迎立武寧節度使劉贊於徐州贊未至太后臨朝甫一月而威篡位武寧軍名今徐州屬江南

契丹家軍馬動準備征行

契丹入寇屠內邱陷饒陽太后命郭威將兵擊之內邱縣名屬順德府饒陽縣名屬真定府

眾將卒裂黃旗高呼萬歲

威至澶州將發將士數千人忽大譟曰天子須侍中自為之將士已與劉氏為仇不可立也或裂黃旗以被威體共扶抱之呼萬歲震地因擁威南行澶州今大名府開州

漢家邦改換作郭氏朝廷

威上太后牋請奉漢宗廟太后詔以侍中監國旋下詔授監國符寶即皇帝位郭威遂稱帝而漢亡

周郭威反澶州花項天子

郭威邢州饒山人漢遣威將兵擊契丹至澶州自立以已為周號叔之後國號周初迎立贊其父河東節

度使劉崇遣使至京師威見使者具道所以立
贊之意因自指其項曰自古豈有花項天子

殺劉贊攻北漢畢露謀心

劉贊劉崇之子崇漢高祖智遠之弟初迎贊於徐州
及威自立贊始至宋州王峻等遣郭崇威將兵拒之
崇威遷贊於外館以太后誥廢贊為湘陰公威尋弑
之先是崇聞隱帝遇害欲起兵南向聞迎立贊乃止
曰吾兒為帝吾又何求至是聞威弑贊於宋州乃即
位於晉陽是為北漢崇乞師契丹會兵攻周晉州威
遣王峻追擊敗之
湘陰縣名屬長沙府

即位後却貢獻頗多善政

周主謂王峻曰朕起於寒微一旦為帝王豈敢厚自
奉養以病下民乎命峻疏四方貢獻珍美食物詔悉
罷之顧充曰郭威即位之後善政頗多罷四方
之貢獻毀漢宮之寶器可謂節儉之主矣

釋唐俘通鄰糴志恤民生

周主獲唐將燕敬權釋之仍遣歸唐濱淮州鎮言唐
淮南飢民過淮糴穀周主詔曰彼之生民與此何異

無得
禁止

謁孔廟致尊崇右文尤異

周主如曲阜謁孔廟將拜左右曰孔子陪臣也不當
拜周主曰孔子百世帝王之師敢不敬乎遂拜又拜
孔子墓命勿樵採訪孔子顏淵之後以為曲阜令及
主簿曲阜縣屬兗州府孔廟在曲阜縣西八里魯
城內即闕里故宅孔子墓亦
在縣西八里世呼為孔林

稱太祖之嗣子繼養柴榮

郭威為後周太祖威無嗣以妻兄柴守禮子榮
養為己子封晉王威殂榮嗣位是為後周世宗

諒陰中自出將立斬樊能

北漢主以契丹兵擊周世宗欲自將禦之羣臣皆曰
陛下新即位山陵有日人心易搖宜命將禦之世宗
曰崇幸我大喪輕朕年少新立朕不可不往乃命馮
道奉梓宮赴山林自發大梁與北漢戰於高平之南

周將樊愛能何徽引騎兵先遁右軍潰步兵千餘人解甲降北漢世宗見軍勢危自引兵親犯矢石督戰宿衛將趙匡口身先士卒馳犯其鋒軍士死戰無不一當百北漢兵大敗愛能等聞捷稍稍復還世宗責之曰汝輩皆累朝宿將非不能戰正欲以朕為奇貨賣與劉崇耳悉斬之自是驕將情卒始知所懼高平縣名屬山西澤州

紀綱正賞罰行三軍喜悅

高平之捷三軍咸服其英武世宗號令嚴明信賞必罰人莫敢犯故破敵廣地所向無前

用文臣任武將各盡其能

史稱世宗文武參用各盡其能無不畏其明而懷其惠捷錄曰世宗相王溥任王朴竇儼修通禮正樂書定大樂設科目而文教彬彬將匡口命李重進韓通敗漢兵平江北復三關而武功烈烈王溥字齊物祁縣人爵祁國公諡文獻竇儼字望之漁陽人王朴字文伯東平人

禁僧尼寬賦稅重農務本

禁私度僧尼凡欲出家者必俟祖父母父母伯叔父之命又謂侍臣曰近朝徵斂穀帛多不俟收穫紡績之畢詔三司自今夏稅以六月秋稅以十月起徵民間便之尤召心農事嘗刻木為農夫蠶婦置之殿庭遣使分行諸州均田而租稅

躬聽訟錄囚徒修政明刑

世宗親錄囚於內苑有汝州民馬遇父及弟為吏所冤死屢經覆按不能自伸世宗臨問得其實人以為神由是諸長吏無不親察獄訟

江北地盡收羅鄰邦入貢

世宗屢自將伐唐唐主屢敗遣司空孫晟等請去帝號割壽濠泗楚光海六州以求罷兵世宗以淮南之地已半為周有欲盡得江北之地不許後世宗復自將攻之所向皆克唐主乃遣侍郎陳覺表請獻廬舒蕪黃四州之地畫江為境以求息兵世宗曰朕本興師止取江北今爾主能舉國內附朕復何求賜唐主書慰納之於是江北悉平唐由是歲輸貢物數十萬吳越王弘俶遣使入貢世宗以詔諭之使出兵擊唐

南漢亦遣使入貢。濠今臨淮縣壽泗二州名俱屬。鳳陽府楚州名今淮安府海州屬淮安府光州屬汝寧府舒今安慶府廬州俱屬。江南蘄黃二州名屬湖廣。

安邊策宏采納遠近歸心

世宗謂宰相曰：吳蜀幽并未能混一，宜命近臣著開邊策各一篇，朕覽焉。北部郎中王朴獻策曰：中國之失吳蜀幽，并非莫不以君暗臣邪，兵驕民困，今欲取之，莫若進賢退不肖，以收其才，恩德誠信以結其心，賞功罰罪以盡其力，去奢節用以豐其財，時使薄斂以阜其民，俟才集事治用充，民附然後舉而用之，功無不成矣。凡攻取之道，必先其易者，唐與吾接壤，其勢易擾也，擾之當以無備之處為始，備東則擾西，備西則擾東，南人懦怯，聞少有警，必悉師以救之，師數動則民疲而財竭，不悉師則我乘虛取之，如此則江北悉為我有，既得江北，則用彼之民，行我之法，江南亦易取，嶺南巴蜀可傳檄而定，燕地必望風內附，惟河東必死之寇，必當以強兵制之，宜且以為後圖，使天下既平，然後伺間一舉可擒也。世宗納之。

剛七載棄群臣宮中晏駕

世宗以北鄙未復，自將伐契丹，取瀛莫易三州，以瓦橋關為雄州，益津關為霸州，遂趣幽州，有疾乃還，在位七年而殂，登遐之日，遠邇哀慕。瀛州今河間府莫州，今省入任邱縣，故城在縣北三十五里，易州屬保定府，雄州今改縣屬河間府，霸州屬順天府。

漢唐來稱獨步有道明君

世宗留心治道，良法美意，未易枚舉，信為五代之三君中之令主，按五代之君，世宗為首，唐明宗次之，周太祖又次之，其餘諸君無足數矣。

符皇后抱孤兒遭時不幸

符皇后，世宗后也。世宗崩，子梁王宗訓立，是為恭帝，時年七歲。

被陳橋兵變起另換乾坤

鎮定三州言北漢會契丹兵入寇，周主遣殿前都點檢趙匡胤帥兵禦之，是夕，次陳橋驛，都指揮使石守信等相與謀曰：主幼弱，我輩出死力破敵，誰則知之不如先立點檢為天子，然後北征未晚也。都押衙

李處耘具以事白都知匡義及歸德掌書記趙普匡義普部分都將環列待旦黎明將士逼匡口寢所曰諸將無主願策太尉為天子匡口驚起披衣未及對黃袍已加身矣眾羅拜呼萬歲掖之上馬還汴遂奉匡口入宮即皇帝位奉周主為鄭王符太后為周太后遷之西宮而後周遂亡 鎮今真定府定即真定府定州陳橋驛在開封府城北四十里

五代史八姓君恩恩日月

朝屬梁暮屬晉草草君臣

五代史宋歐陽修所撰梁一姓唐三姓晉一姓漢一姓周二姓五代共五十三年顧氏總論曰五代得國有四君而三姓者有三君而二姓者其傳世之久後梁十有七載其次者後唐十有四載後周十有二載後晉十有一載至其感者四載而失矣歷數若逆旅承代如隙駒中原塊土屢為篡奪之場世運至此豈非天地一塞會哉

當此際亂離中稱王據土

五代之時中間僭號割據者凡十一國

顯神通誇智勇更有能人

閩國主王審知因兄起事

王審知光州固始人唐光啟中福建觀察使陳巖表審知兄潮為泉州刺史巖卒其塔范暉自稱留後潮遣審知攻暉殺之唐即以潮為觀察使潮以審知為副使潮卒舍其子而命弟審知知軍府事審知自稱福建留後表聞於朝後為閩太祖 光州固始縣俱屬汝寧府泉州府屬福建

奉唐朝封節度北面朱溫

唐以閩福州為武威軍拜審知節度使及朱溫篡唐審知降梁梁封為閩王

乘白馬號三郎合軍推重

審知常乘白馬軍中號為白馬三郎

甘棠港風雷助黃崎波平

審知招來海中蠻夷商賈奈福州海口黃崎岫橫石
巉峭常為舟楫之患審知思欲制置憚於役力乾寧
中夢金甲神自稱吳安王許助開鑿及覺命判官劉
山甫往設祭祭之未終海內靈怪俱見山甫憩於僧
院憑高觀之風雷暴興見一物非魚非龍鱗黃鬣赤
凡三日風雨乃霽已別開一港甚便行旅驛表以聞
賜號甘棠港

據福建統漳泉稱王僭號

審知據福州盡有漳泉
五州之地僭稱閩王

老將來子延翰繼統為君

後唐同光三年審知卒子
延翰嗣位自稱大閩國王

蔑昆仲棄良言遭逢義弟

斬其身奪其位與弟延鈞

延翰蔑棄兄弟出弟延鈞為泉州刺史延翰多取民
女以充後庭延鈞上書極諫由是有隙審知養子延

稟本姓周氏為建州刺史延翰使之采擇延稟復書
不遜亦有隙二人遂合兵襲福州延稟先至棧城而
入延翰驚匿延稟執之暴其罪惡斬於門外延鈞至
延稟自以養子推延鈞為威武留後建州今建寧
府

收父妾任妖巫縱妻淫佚

九龍殿稱皇帝貯一歸郎

閩人有言真封宅龍見者延鈞更命其宅曰龍躍宮
遂改元龍啟稱皇帝更名鱗鱗好鬼神任妖巫徐彥
林使視鬼於宮中多信巫為殺戮審知婢金鳳姓陳
氏陋而淫鱗嬖之立為后初鱗有嬖吏歸守明者以
色見倖號歸郎鱗後得風疾陳氏與歸郎奸又有百
工院使李可殷因歸郎以通陳氏鱗命錦工作九龍
帳國人歌曰誰謂九
龍帳惟貯一歸郎
按楚王希範作九龍殿刻沈香為八龍飾以金寶
長十餘丈抱柱相向希範居中自為一龍其幘頭脚
長丈餘以象龍角此應
為九龍帳殿字應誤

臨死病見鬼昏繼鵬謀亂

李可殷嘗諳皇城使李倣於麟后族陳巨勝無禮於福王繼鵬倣與繼鵬皆恨之時麟已病初建州刺史延稟攻麟麟擊殺之至是享軍士於大醜殿坐中昏然言見延稟倣以麟病已甚遂使人殺可殷陳后訴之麟力疾視朝詰可殷死狀倣懼出與繼鵬謀作亂

李皇城行弒逆血濺宮庭

李倣與繼鵬率皇城衛士入宮麟聞鼓譟聲走匿九龍帳中亂兵刺殺之并殺陳后及歸守明陳巨勝等

繼鵬立改名景擒誅賊倣

繼鵬麟之長子即位更名景李倣既弒麟而立景專制國政陰養死士景患之與拱宸指揮使林延皓謀俟倣入朝執誅之詔暴其弒君之罪

三清臺鑄金像剪滅宗親

景拜道士譚紫霄為正一先生陳守元為天師妖人林興以巫見幸事無大小興以寶皇語命之而後行

守元教景起三清臺以黃金數千勛鑄寶皇老君像晝夜焚香作樂禱祀適虹見其宮中興託鬼神語云此宗室將為亂之兆也乃命興率壯士殺其叔父延武廷望及其子五人三清謂玉清元始天尊上清道君天尊太清老君天尊

憤聚麀立春鸞南宮避火

璘婢李春鸞景先烝之因陳后以求於璘與之至是立以為后南宮避火註見後

空名牒賣官爵信用私人

時百役繁興用度不足有司除官皆令納賂籍而獻之以貨多寡為差又遣監人陳究以空名堂牒賣鬻官爵於外初閩以梁太祖元從為拱宸控鶴都景更募壯士為腹心號宸衛都獨信用之祿賜甚厚二都怨望又數侮拱宸都將朱文進控鶴都將連重遇二人由是亦怨

叔父曦行戰討死於野次

審知少子延曦景叔父也景幽於私第會術者言宮中當有災景徙南宮避災而宮中果火景疑連重遇

知縱火之謀因語內學士陳郊郊反以告重遇重遇懼乃帥二都兵迎延曦縱火焚南宮景與春鷺出北關宿於野次延曦使兄子繼業率兵追景及之繼業醉景而縊之及其妻子皆死延曦乃自立為閩國王曦更名

曦既篡讐諫諍酒色昏沉

曦既篡位驕淫苛虐忌誅宗族諫議大夫黃峻昇觀詣朝堂極諫曦曰老物發狂矣貶漳州司戶校書郎陳光逸疏過惡五十餘事曦殺之曦嘗為牛飲羣臣侍酒醉而不勝有訴及私并酒者輒殺之嘗宴侍臣皆以醉去獨學士周維岳在曦曰維岳身甚少何飲酒之多左右曰酒有別腸不必長大曦命捽維岳下殿欲剖視其酒腸或曰殺維岳無人復能侍陛下劇飲者乃捨之賢妃尚氏有殊色曦嬖之醉中妃所欲殺則殺之所欲宥則宥之

李仁遇以色升外甥作相

曦外甥李仁遇年少美姿容得幸於曦以為左僕射同平章事

酗悍妻希立子挑鬪群臣

朱文進六七人乘其空便

一張弓就馬上拉殺強魂

拱宸都指揮使朱文進與連重遇既弒景懼國人之討相與結姻以自固曦疑之嘗酒酣誦白居易詩云惟有人心相對間咫尺之情不能料二人大懼曦后李氏悍而酗酒妬尚賢妃之寵欲圖曦而立其子亞澄使人告二人曰主上甚不平於二公奈何會后父李真有疾曦往問之文進等使馬步使錢達拉曦於馬上而弒之並殺王氏宗族五十餘人

自披起袞龍袍稱孤道寡

重遇等既弒曦乃推文進升殿被袞冕帥羣臣北面稱臣文進自稱閩王

吳成義函其首送與新君

新君者王延政儼明阻亂

延政審知子曦之弟為建州節度使封富沙王初曦
淫虐延政數貽書諫之曦怒遣杜建崇監其軍延政
逐之稱帝於建州國號殷及朱文進弒曦而自立延
政遣吳成義進攻福州會南唐遣兵攻建州成義詐
使人懼南唐承旨林仁翰帥其徒三千人斬連重遇以
其首示眾曰富沙王且至汝輩族矣今重遇已死何
不亟取文進以贖罪遂斬文進迎成義入城函二首
送建州福州既平閩之故臣請延政歸福州延政以
方有唐兵未暇徙都乃改國號曰閩以從子繼昌鎮
福州初光州人李仁達仕閩叛奔建州及文進之亂
復叛奔福州會繼昌暗弱嗜酒不恤將士仁達遂與
浦城人陳繼珣等殺繼昌並成義欲自立懼眾不附
以雪峰寺僧卓儼明素為眾所重相與迎立以為帝
按儼明一書作巖明雪峰寺在
福州城西一百餘里雪峰山內

李仁達攜所據獻與金陵

南唐主受其降封官賜職

延政遣兵攻福州儼明無他方畧但於殿上噴水散
豆作諸法事仁達陰教軍士突前刺殺儼明共執仁

達使居儼明之坐仁達乃自稱威武留後遣使至金
陵奉表降唐唐以仁達為節度使賜名弘義唐兵攻
建州先鋒使王建封先登遂克建州延
政出降至金陵唐以為羽林大將軍

六十年彈指過水上浮萍

按自唐光啟二年王潮為泉州刺史至南唐保大四
年而滅為六十一年然其奄有閩國則當自唐景福
元年為始實
五十五年

淮南地有吳王楊行密氏

昭宗時廬州起戰討稱能

楊行密廬州合肥人唐僖宗時起兵為亂自號八營
都知兵馬使據廬州中和三年淮南節度使高駢表
知廬州事改名行密因命為廬州刺史宣州觀察使
秦彥入揚州殺駢行密攻克之彥遁行密自稱淮南
留後既而孫儒陷揚州自稱節度使行密復奔廬州
昭宗景福元年行密擊斬孫儒復歸揚州昭宗以為
淮南節度使遂盡有江淮之地後昭宗奔鳳翔令行
密討朱全忠立功以為行營都統賜爵吳王合肥

縣屬廬州府
淮南今揚州

滅孫儒敗全忠黑雲精甲

孫儒初據揚州而不能守乃焚其城驅眾渡江以攻行密行密大懼其將劉威曰背城堅柵可以不戰疲之行密從之乃使張訓屯安吉斷其糧道儒食盡士卒大疲行密縱兵擊之儒大敗行密將田頴擒斬之朱全忠大舉擊行密遣龐師古壁清口葛從周壁安豐全忠自將屯宿州行密與將朱瑾將兵三萬拒之瑾墮淮上流欲灌之乃以兵引度趣戰師古拒戰淮水大至汴軍駭亂行密督大軍夾攻之遂斬師古從周奔還行密乘勝追擊殺溺殆盡全忠亦奔還由是行密保據江淮全忠不能復爭初行密以孫儒降兵選其尤勇健者五千人以皂衣蒙甲號黑雲都每戰使之先登陷陣四鄰畏之安吉州名屬湖州府清口清河口也在淮安城西五十里安豐縣名故址在鳳陽府壽州南六十里宿州屬鳳陽府

戮蔡儔不毀墓尤見寬仁

行密寬仁雅信能得士心廬州刺史蔡儔叛發行密父祖墓行密遣李神福討之克廬州斬儔左右請發

儔父母冢行密曰此儔之罪也吾何為效之

二十載忠武王承唐節制

初唐昭宗遣金吾將軍李儼至揚州封行密為吳王行密始建制敕院每有封拜輒以告儼於紫極宮元宗像前陳制書再拜然後下及卒謚忠武行密於僖宗光啟三年夏四月攻揚州冬十月克之自稱淮南留後至天祐二年乙丑卒凡二十年

統軍州二十八延攬英雄

行密據廬州等處凡二十八郡推心待物無所猜忌故能招致英雄第舍姬妾每選其尤者以賜將士人咸樂為盡力

納朱瑾任田頴一班猛悍

兖州朱瑾善槊為梁所攻敗奔行密初行密之兵皆江淮人最為輕弱及得瑾勁騎而兵益振田頴從行密起微賤屢立戰功與安仁義朱延壽等皆猛悍難制

有機權能駕御操慮危深

行密寬簡而有智畧善駕御將士以田頽等猛悍欲除之頽遂叛與行密妻弟朱延壽通謀行密陽為目疾每行故觸柱而仆乃召延壽欲託以子延壽至刺殺之遂擊斬頽

長子渥號威王無才寡德

渥行密長子素無令聞軍府輕之行密卒指揮使徐溫張顥立渥為淮南節度使弘農郡王是為吳威王按五代史渥謚曰景

十圍燭終見弒張顥徐溫

渥居喪酣飲作樂燃十圍之燭以擊毬張顥徐溫泣諫渥怒顥溫遂作亂帥牙兵露刃入庭中渥曰爾果欲殺我耶對曰非敢然也欲誅王左右亂政者耳執渥所親信者盡殺之由是溫等專制軍政渥不平謀誅之二人遂遣盜入寢中弒渥

弟隆演號宣王改元武義

張顥既弒渥欲自立幕僚嚴可求急書一紙置袖中麾同列詣使宅賀眾莫測其所為既至乃太夫人史氏教也言嗣王不幸早世隆演次當立諸將宜無負楊氏辭旨明切顥以其義正不敢奪乃奉渥弟隆演稱留後徐溫自以權重而位卑屢請隆演稱帝不許乃即吳國王位置百官宮殿文物皆用天子禮改唐天祐十六年為武義元年後謚曰宣

葫蘆提十六載委政群臣

隆演重厚恭恪徐溫父子專政建國稱制俱非其意常怏怏酣飲鮮食遂成疾而卒在位十六載

讓皇溥蒙大號受拘徐氏

溥行密第四子封丹陽公隆演卒徐溫迎立之後稱帝溫卒養子徐知誥封齊王專執朝政溥備位而已後知誥篡位奉溥為讓皇

把江山抱送去古潤潛身

時知誥都金陵溥下詔禪位於齊吳太尉李德誠等詣金陵勸進知誥遂即位溥請徙居知誥改潤州牙

城為丹陽宮以居之
潤州今鎮江府

四代主走風雲三十六載

吳自行密至溥凡四代自行密天復元年稱王
至晉天福二年為知誥所篡凡三十六年而亡

合家門被囚禁結果刀兵

溥卒知誥遷其子孫於海陵號永寧宮嚴兵守之絕
不通人久而男女自為匹偶至世宗征淮南下詔撫
安楊氏子孫李景聞之遣人盡滅其族
楊氏遂絕 海陵今省入揚州府泰州

南唐主李家郎大唐枝葉

吳徐溫養為子累立功勳

知誥徐州人唐憲宗子建王恪四世孫恪生超超生
志志生榮榮生誥年八歲楊行密拔濠州掠得之養
以為子行密子渥憎之行密謂徐溫曰此兒志狀頗
異吾度渥必不能容今賜汝為子溫即令其以徐為
姓名曰知誥及長為吳樓船軍使以有功拜昇州刺
史時溫子知誥秉政為朱瑾所殺知誥以州兵渡江

定亂遂專政後更名誥篡楊氏之祚稱帝
國號唐是為南唐烈祖 昇州今江寧府

弟兄間幾遭兒刀鋒幸免

誥初事溫甚謹溫嘗罵其諸子皆不如誥誥弟兄頗
不能容而知誥尤甚惟季弟知諫以兄事之知誥秉
政召兄弟飲欲害誥行酒吏刁彥能覺之酒至誥以
手爪搯之誥悟走免後自潤州入覲與飲於山光寺
又欲害之知諫躡誥足乃遁去知誥以劔授
彥能使追殺之彥能給以追之不及始免

延賓亭招賢士大度多能

誥初秉政時寬仁勤儉接禮儒者起延賓亭以待四
方之士引宋齊邱路知祥王令謀等為謀客士有羈
旅於吳者皆齒用之又寬刑法推
恩信以收人心故吳人咸附之

封齊王據金陵承溫舊業

初溫以金陵形勝戰艦所聚乃自為淮南行軍副使
領昇州刺史後封東海王及溫卒誥為太尉中書令
出鎮金陵後自為大元帥
封齊王復營宮城於金陵

白鬚髯照鏡歎禪代興心

誥久有傳禪之志以吳主溥無失德恐眾心不悅一
旦臨鏡緝白鬚顧其吏周宗歎曰國家安而吾老矣
奈何宗知其意請如江都以傳禪諷吳主後誥以吳
太尉李德誠中書令李本位尊望重密使之帥眾推
戴德誠等遂表誥功德請行冊
命乃詣金陵勸進誥遂受禪

不乘災與錢氏息兵通好

吳越府署火吳越王錢元瓘驚懼發狂疾唐人勸誥
乘敝取之誥曰奈何利人之災遣使唁之且矜其乏

統南州三十五復姓稱尊

誥統金陵凡三十五州徐氏諸子皆請誥復姓誥以
不敢忘徐氏恩下其議百官皆請然後復姓李氏改
名昇自言唐氏子孫立
唐宗廟祖考皆追尊焉

宋齊邱青陽公始終謀主

石香爐對畫字商略何深

洪州進士宋齊邱好縱橫昇知之以為謀主纂楊氏
最為有功昇嘗引齊邱於水亭屏語或居高堂悉去
屏障獨置一人石香爐以箸畫灰為字隨以匙滅之
所謀人皆莫知後歸九華山賜號九華先生封青陽
公 洪州今江西南昌府九華山在青陽縣南舊名
九子山唐李白陋其名以山九峯如蓮華乃更其名
青陽縣屬池州齊邱字子嵩萬載人李白字太白蜀
人母夢長庚星入懷因以命名賀知章見其文曰謫
仙人也唐元宗
詔供奉翰林

黜宋氏枕席言驪姬息譖

定儲嗣只片語尤見知人

昇欲以長子璟為嗣嘗如璟宮遇璟親調樂器大怒
數日幼子景暹母种氏有寵乘間言景暹可為嗣昇
怒曰子有過父訓之常事也國家
大計女子何得預知即命嫁之
瑣按宋氏昇后也昇並無黜宋氏事
且以驪姬借喻則宋氏或應作种氏

年將老餌金丹時加暴怒

昇壽五十六以方士獻金丹餌之
浸成躁急羣臣奏事往往暴怒

丁栖霞諫不盡飽喜飢噉

昇問道士王栖霞何道可致太平對曰王者治心治
身乃治家國今陛下尚未能去飢噉飽喜何論太平

疽發背壽云終廟稱烈祖

昇疽發背疾亟子璟入侍昇曰吾餌金石始
欲益壽乃更傷生汝宜戒之遂殂廟號烈祖

子李景副都統嗣位相承

初昇鎮金陵以子景通為吳司徒昇將篡吳召景通
歸金陵為副都統昇即位封為齊王昇卒景通嗣位
改名璟周世宗時璟稱藩於周避
周廟諱又更名景是為唐元宗

性寬仁任查陳優柔寡斷

景性寬柔寡斷以馮延巳為學士馮延魯為中書舍
人陳覺為樞密使魏岑查文徽為副使皆以邪佞用

統朝綱失主宰五鬼縱橫

事吳人謂之五鬼中外庶政委齊王景遂參決惟
陳覺查文徽得奏事羣臣非召見者皆不得入

打焚過晉漢周三十九載

唐自晉天福二年昇稱尊至開慶八年
末主煜降宋歷晉漢周凡三十九年

末主煜貶制度納貢金陵

煜景第六子其五子皆早卒景卒煜嗣位遣侍郎馮
延魯納貢於宋下令貶損制度止稱國主改唐曰江
南下書稱教改中書門下省
為左右內史諸王皆為國公

好聲色喜浮屠諫臣獄死

煜性驕侈好聲色喜浮屠出禁中金錢募人為僧煜
退朝與后服僧衣誦佛書僧有罪命禮佛而釋之宋
太祖聞其惑選少年有口辨者南渡論性命之說煜
信重謂之一佛出世由是不復以治國守邊為意內
史舍人潘佑上書極諫
煜收下獄佑自縊死

徐鉉舌攬不住宋將曹彬

宋太祖屢遣使召煜入朝煜稱疾不行乃命曹彬伐之煜遣其臣徐鉉之宋乞緩師鉉自負欲以口舌馳說宋太祖曰煜以小事大如子事父未有過奈何見伐反覆辨論累數百言太祖曰爾謂父子者為兩家可乎卧榻之側豈容他人鼾睡耶鉉無以對彬至江陵遣使招煜降煜不聽彬攻克之煜出降宋封煜為違命侯徐鉉字鼎臣官散騎常侍所著有徐常侍集三十卷

吳越國主錢鏐杭州創業

錢鏐臨安人唐光啟中鏐為杭州刺史天復中封越王天祐中又封吳王朱溫篡唐封鏐吳越王臨安縣名屬杭州府錢鏐字真美

討董昌封節度鎮海功臣

唐改越州為威勝軍以董昌為節度使以鏐為鎮海軍節度使昌求為越王未許昌不悅遂僭號於越州唐昭宗使鏐討之鏐遣其將顧全武進兵越州攻克其外郭昌尤據牙城拒之鏐給昌曰奉詔令大王致仕歸臨安昌出降全武斬之朝廷乃改威勝為鎮東以鏐為鎮海鎮東節度使

顧全武結淮南削平徐許

初孫儒為楊行密所殺其士卒多奔浙西鏐愛其驍悍以為中軍號武勇都至是鏐如衣錦軍命指揮使徐縮帥其眾以治溝洫眾有怨言謀殺鏐不果鏐命縮將所部先還杭州及外城縱兵焚掠左都許再思與之合進逼牙城鏐聞變微服乘小舟夜歸踰城而入杜建徽亦自新城入援顧全武曰聞縮等謀召田頵頵至則淮南助之不可敵也建徽曰孫儒之亂王嘗有德於楊公今往告之宜有以相報鏐命全武告急於行密且以子傳璪為質縮等果召頵頵引兵赴之急攻杭州全武至廣陵說行密行密許之以女妻之傳璪使人召頵頵乃與徐許俱歸宣州衣錦軍五代唐所置今併入臨安縣

司馬福救姑蘇水底潛身

淮南遣指揮使周本攻圍蘇州鏐遣指揮使錢鏐救之蘇州有水通城中淮南軍張網綴鈴懸水中以斷潛行者魚鼈過皆知之吳越虞侯司馬福善水行欲潛入城故以竿觸網敵聞鈴聲舉網福因得入城由是城中號令與援兵相應淮人以為神因內外夾攻大破之本夜遁

受王封統軍州一十三郡

梁封鏐為吳越王客有勸鏐拒梁命者鏐笑曰
吾豈失為孫仲謀耶受之據兩浙統十三郡

三節還終壽考衣錦馳名

鏐素所居營曰衣錦營後升營為衣錦城石鏡山曰
衣錦山嘗遊衣錦城宴故老山林皆覆以錦號其幼
所戲大木曰衣錦將軍又作還鄉歌曰三節還鄉兮
挂錦衣父老遠來兮相追隨牛斗無字人無欺吳越
一王駟馬歸壽八十一卒謚曰武肅石鏡山在臨
安縣治南山之東峯有圓石徑二尺七寸其光明如
鏡

錢元瓘守成規臨安大火

鏐卒子傳瓘立更名元瓘凡事盡守成規上下輯睦
適臨安大火燒其宮室迨盡元瓘避之火輒隨發元
瓘驚懼
病狂

十年終傳幼子政務公勤

元瓘在位十年卒子弘佐立弘佐雖
幼躬勤政務發摘奸伏人不敢欺

忠獻王年十三威權猷攬

弘佐後謚忠獻即位時年十三諸將皆少弘佐弘佐
初優容之諸將稍不法弘佐乃黜其大將章德安於
明州李文慶於睦州殺內都監杜昭達統軍使闞璠
由是國中皆畏恐明州今寧波府睦州今嚴州府

敗李景取福州七載而薨

初閩李仁達據福州叛立僧卓儼明為帝已而殺儼
明而自立閩主王延政發兵討之仁達遂附於唐主
李景旋復叛景遣兵攻之仁達乞救於弘佐諸將
皆不欲行弘佐曰吾為天下元帥而不能舉兵耶諸
軍但樂飽食安坐耳乃遣統軍張筠等救之不克復
遣余安將水軍救之至白蝦浦海岸泥淖須布竹箬
乃可行唐軍聚而射之箬不得施唐將馮延魯曰相
持不戰徒老我師不若縱其登岸盡殺之則福州自
降矣吳越兵既登岸大呼奮擊延魯棄眾而走城中
兵亦出夾擊唐兵大破之唐軍遁余安遂取福州而
還弘佐在
位七年卒

弟弘侗碧波亭厚其軍賞

弘侗弘佐之弟初即位統軍使胡進思恃迎立功干預政事弘侗惡之因閱兵於碧波亭方第賞進思前諫以賞太厚弘侗怒擲筆水中曰以物與軍士吾豈私之何見咎也進思大懼

胡進思題畫懼廢立生心

強扶持錢弘俶攻唐奉詔

畫工獻鍾馗擊鬼圖弘侗題詩圖上進思見之以詩意將殺已遂帥衛兵入廢弘侗囚於義和院矯稱王命云猝得風疾傳位與弟弘俶弘俶曰能全吾兄乃敢承命進思許之弘俶始視事周世宗伐唐弘俶遣使入貢周以詔諭之使出兵擊唐弘俶遂遣丞相吳程攻唐常州

俗奢淫疲貢獻重斂於民

浙俗喜淫侈偷生工巧自鏐世常重斂其民以事奢僭下至雞魚卵殼必家至而日取之多掠得嶺南商賈寶貨當五代時常貢奉中國不絕至周世宗時弘俶勢益孤傾其國以事貢獻宋太祖時益以器服珍

奇為獻不可勝數

論始末自唐朝周旋五代

八十年歸大宋忠孝賢人

唐乾符中鏐為鎮海鎮東軍節度使至宋太宗太平興國三年凡八十四年弘俶以地歸宋宋封為淮海王而國始除丁南湖曰錢氏三世四主與五代相終始竟能不失臣節及宋受命不待告命入獻土地此其奕世忠孝蘇子表忠碑論之悉矣蘇軾知杭州傷錢氏墳廟不治請以妙因院賜名表忠觀軾為立碑銘曰天胙忠孝世有爵邑允文允武子孫千億

湖南主楚王殷扶風馬氏

馬殷許州鄆陵人自謂扶風馬援之裔唐昭宗時為潭州刺史後梁朱溫封殷為楚王據湖南地二十三郡鄆陵縣名屬開封府潭州今長沙府

始殘唐終五代父子相承

殷自唐乾寧二年入湖南父子二世六
主歷梁唐晉漢周至周廣順元年而亡

武穆王勇而謀寬慈樂善

殷後謚曰武穆英勇有謀尤寬
仁恤下待士以禮人爭附之

獲吳人仍遣去頗著仁聲

吳雄武軍使苗璘統軍王彥章將水軍攻楚岳州殷
遣許德勳禦之德勳潛軍角子湖使王環夜帥戰艦
二百屯楊林浦絕吳歸路遲明吳人進軍江口德勳
命虞侯詹信以輕舟出吳軍後德勳以大軍當其前
夾擊之擄璘及彥章以歸吳求和於楚請璘
與彥章殷遣歸之 雄武軍今漢中府利州

多內寵欠規繩無分嫡庶

眾駒兒爭阜棧會有紛紜

殷多內寵嫡庶無別而次子希聲母袁夫人有美色
尤寵之嫡子希振以無寵棄官為道士餘子十餘人
皆驕奢滋甚初苗璘等歸吳許德勳餞之謂曰楚國
雖小舊臣宿將猶在願吳朝勿以措懷必俟眾駒爭

阜棧然後可圖也 阜槽櫃棧編木為足安
馬脚下謂之馬床喻馬殷諸子必自相爭也

子希聲害謀臣黃羅四塞

殷以子希聲知政事總諸軍初殷用都軍判官高郁
為謀主國以富強隣國疾之荆南高季昌嘗使謀者
間郁於殷殷不聽及希聲用事謀者語希聲曰季昌
聞楚用高郁大喜以為亡馬氏者必郁也希聲素愚
以為然遽奪其兵柄左遷郁行軍司馬郁謂所親曰
亟營西山吾將歸老獅子漸大能咋人矣希聲聞之
益怒矯以殷命族郁而殷不之知是日大霧四塞殷
語左右曰吾昔從孫孺度淮每殺不辜多致茲異今
馬步院豈有冤死者乎明日吏以郁死白殷拊膺大
慟曰吾老耄政非已出使我勳舊橫罹冤酷既而顧
左右曰吾亦何可久處
此乎明年殷卒希聲立

葬親爺飽噉雞貽笑蒸豚

希聲嘗聞梁太祖好食雞慕之乃日烹五十雞以供
膳及居喪無戚容葬殷之日頓食雞臠數盤侍郎潘
起譏之曰昔阮籍居喪而食蒸
豚何代無賢 阮籍字嗣宗

希範繼封楚王天策上將

初殷遺命諸子兄弟相繼及希聲卒弟希範嗣位襲封楚王晉高祖加天策上將軍希範為作天策府

平南蠻立銅柱自許英能

溪州刺史彭士然引羣蠻寇辰澧希範遣劉勅等討平之自是羣蠻服於楚希範自謂伏波之後以銅五千觔鑄柱高一丈二尺入土六尺命學士李臯銘誓狀於上立之溪州溪州今陞為永順等處軍民宣慰使司隸湖廣都司辰州府名澧州屬岳州府銅柱在辰州府城西北一百一十里

會春園極奢豪疎賢拒諫

楚地多產金銀茶利尤厚希範遂奢欲無厭務窮侈靡乃作會春園嘉宴堂九龍殿皆飾以金寶其費鉅萬始加賦於國中策賢士拓拔恒上書諫曰殿下馳騁遨遊雕墻玉食府庫盡矣而浮費益甚百姓困矣而厚斂不息諺曰足寒傷心民怨覆國願罷不急之務減興作之役無令一日禍敗為四方笑希範大怒他日請諫辭以晝寢恒謂人曰王逞欲而懷諫吾見其千口飄零無日矣希範益怒終身不復見之

假慈悲殺其弟就裏無仁

希範弟希杲為靜江節度使有善政監軍裴仁煦譖其收衆心希範疑之會漢侵蒙桂二州希範自將如桂州希杲懼其母華夫人逆希範於全義嶺謝曰希杲為治無狀致寇戎入境妾之罪也願削封邑洒掃掖庭以贖希杲罪希範曰吾久不見希杲聞其治行尤異故來省之無他也漢兵引去徙希杲知朗州卒殺之靜江軍名今廣西桂林府蒙州今省入平樂縣故址在平樂府城南桂州即今桂林府朗州今常德府

馬希廣既承家何曾展志

朗州兄仍下手鈍漢遭刑

希範卒同母弟希廣嗣位兄希萼為朗州節度使希廣庶弟希崇性狡險陰遺希萼書言劉彥瑫等違命廢長立少希萼來奔喪彥瑫等白希廣殺之希廣曰吾何忍殺兄寧分潭朗而治乃遣還朗州希萼遂起兵趣長沙希廣曰朗州吾兄也當以國讓之彥瑫不可乃以王贊進擊之破其兵追希萼將及希廣遣使

召之曰勿傷吾兄贊引還希萼歸乃誘辰淑州及梅山蠻共攻潭州又遣使稱藩於唐王景乞師攻楚唐命楚州刺史何敬洙將兵助之希廣遣彥瑫徑趣朗州為希萼所敗希萼遂進攻潭州或告希崇流言惑眾請殺之希廣曰吾何忍自害其弟不聽乃遣希崇許可瓊等拒之希萼間遣使以厚利啖可瓊可瓊舉軍降長沙遂陷希廣被擒希萼曰此鈍漢也豈能為惡為左右所惑耳顧左右曰吾欲活之何如皆不對遂縊殺之淑州
今辰州淑浦縣

馬希萼剪連枝荒淫無道

希萼既弑希廣自稱楚王得志恣縱荒淫無道政事悉委希崇希崇復多私曲政刑紊亂

端陽門縱惡馬壯士搗隨

彭師曷結徐威反戈修怨

被群臣幽囚在衡嶽山林

希崇與楚舊將徐威孟俊等謀作亂希萼置酒宴將吏於端陽門希崇辭以疾威等縱惡馬十餘匹入府

以壯士執搗隨之聲言繫馬突入其府劫庫兵執希萼囚之迎立希崇乃幽希萼於衡山初希萼入長沙杖彭師曷背黜為民希崇以師曷必怨之使送希萼於衡山師曷曰欲使我為弑君之人乎與衡山指揮中廖偃等共立希萼為衡山王遣使降唐主景衡山縣名屬衡州府

策立起馬希崇降唐受制

希崇既立縱酒荒淫徐威等知必無成欲殺希崇希崇大懼密表請兵於唐唐遣邊鎬將兵趣長沙希崇請降希萼望唐立己為潭帥而潭人惡希萼共請邊鎬為帥鎬趣希崇希萼入朝盡遷馬氏之族於金陵唐以希萼鎮洪州希崇鎮舒州

五十年又六載水迹潮痕

楚立五代共五十六年而亡

荆南主高季興梁朝養子

高季興陝州硤石人本名季昌避後唐獻祖廟諱更名季興少為汴州富人李讓家僮梁太祖初鎮宣武

讓以入貲得幸養為子易其姓名曰朱友讓季興以友讓故得進見梁太祖奇其材命友讓以子畜之遂姓朱為制勝軍使後徙潁州防禦使復姓高氏至後唐同光三年封南平王據荆南三州南平今岳州府安鄉縣

鎮江陵善招輯渤海封膺

梁初以季興為荆南節度使當唐之末為諸道所侵季興始至江陵一城而已兵火之後井邑凋零季興招輯撫綏人士歸之梁末帝封季興為渤海王

梁滅後入朝唐幾於虎口

唐莊宗滅梁季興欲入朝其臣梁震曰唐有吞天下之志嚴兵守險猶恐不保况入朝乎且公朱氏舊將安知彼不以仇敵相遇季興不從遂入朝唐主待之甚厚欲留之郭崇韜曰陛下新得天下諸侯不過遣子弟將佐入貢惟季興身自入朝若羈留不遣沮匹海之心乃遣之季興倍道而去至江陵握震手曰不用君言幾不免虎口

既降唐留蜀物又做吳臣

季興既降唐及唐破蜀以蜀金帛四十餘萬自陝而下季興聞莊宗之變乃悉邀留蜀物殺使者韓珙等唐主詰之對曰欲知覆溺之故宜自按問水神唐以招討劉訓攻之不克別將西方鄴克其變忠萬三州季興遂以荆歸峽三州臣於吳夔今夔州府忠州屬重慶府萬今夔州府萬縣荆今荆州府歸今歸州峽今夔州府俱屬荆州府

父傳子一家兒心無定向

季興卒吳立其子從誨從誨以父自絕於唐懼復見討乃遣使者聘於楚楚王殷為之請命於唐從誨亦遣使奉表進贖銀三千兩明宗拜為節度使渤海王

據江湖攔要路劫掠為生

荆南地狹介於吳楚為小國自吳稱帝而南漢閩楚歲時貢奉皆假道荆南季興從誨常邀留其使者掠取其物而諸道以書責誨或發兵加討即復還之而無愧

貪賞賜愛便宜自輕自賤

醜名兒高無賴到處稱臣

唐晉契丹漢更據中原南漢與閩吳蜀皆稱帝從誨所嚮稱臣蓋利其賜予故諸國賤之謂之高無賴

高從誨高保融傳之保勗

從誨卒第三子保融立保融卒從誨第十子保勗立

受淮南吳國主封號為秦

高季興降吳淮南吳主溥封季興為秦王

高繼冲結末梢投降趙宋

保勗卒保融子繼冲立初武平節度使周行逢卒子保權嗣衡州刺史張文表叛襲潭州據之保權請救於宋宋命慕容延釗討之以李處耘為都監及行宋太祖謂曰江陵四分五裂之國今假道出師因而下之蔑不濟矣處耘至襄州諭以假道之意判官孫光憲曰中國自世宗時已有混一天下之志今宋帝規

模宏遠不若早以疆土歸之不失富貴繼冲乃遣其叔保寅奉牛酒犒師於荆門且覘強弱是夕保寅宴於延釗帳中處耘密遣輕騎倍道前進繼冲聞宋師奄至惶怖出迎因盡籍其境內州縣戶口奉表納之後率其將吏宗族入朝宋拜為武寧軍節度使

五七年如一夢故紙虛名

季興自梁開平元年鎮荆南至宋乾德元年國除凡五十七年

前蜀主大唐朝利州王建

王建許州舞陽人唐僖宗時為利州刺史昭宗時為西川節度使進爵蜀王利州今保寧府

逐昭度殺令孜虎將馳名

建初為宦者田令孜養子西川節度使陳敬瑄令孜同母弟也令孜以僖宗播越天下皆罪之懼無所容乃自求為西川監軍時建據閬州令孜謂敬瑄曰建吾子也今召之可致麾下遣使召建建即帥精騎西至鹿頭關西川參謀李又曰建虎也延之入室安肯為公下乎遣人止之建怒破關而進拔漢州急攻成

都不克乃疏敬瑄之罪表請討之昭宗乃使宰相韋昭度為西川節度使以建為永平軍節度徵敬瑄為龍武統軍敬瑄不受代昭宗即命昭度等討之久之不克朝廷諭建等罷兵建曰大功垂成奈何棄之周庠勸建請韋公還朝獨克成都建乃說昭度曰今關東藩鎮迭相吞噬此腹心之疾相公宜早歸與天子謀之敬瑄疥癬責建可辦也昭度猶豫不決建擒其親吏駱保於行府門鬻食之昭度大懼遽以印節授建即日東還建急攻成都令孜自攜印節詣建營授之敬瑄開城降建請朝廷殺之不許建使人告敬瑄作亂令孜通鳳翔書皆殺之

唐亡後檄討梁仍稱天復

梁朱溫篡唐稱帝時惟河東鳳翔淮南稱唐昭宣帝天祐年號建稱昭宗天復年號餘俱稟梁正朔建移檄諸道云欲與岐王晉王會兵興復唐室卒無應者

併兩川稱帝號百戰辛勤

建既據西川欲圖併東川遣王宗滌將兵攻之建自將圍梓州與東川節度顧彥暉凡五十餘戰蜀州刺

史周德權言於建曰東川羣盜多據州縣彥暉皆啗以厚利恃其救援故堅守不下若遣人諭賊帥以禍福則彼反為我用矣建從之彥暉勢益孤建急攻克之彥暉自殺於是并有兩川之地至朱溫滅唐建遂稱帝西川成都府曰西川潼川州曰東川梓州即潼川州

王宗衍出深宮立繇母寵

時太子元膺卒羣臣請立太子建第十一子鄭王宗衍最幼其母徐賢妃有寵遂立之建卒宗衍立乃去宗名衍

任中官貪女色寵用妃嬪

衍年少荒淫委政於宦者宋光嗣王承休景潤澄歐陽晃等承休曰秦州多美婦人請為陛下采擇以獻遂以承休為節度使教坊使嚴旭皆強取民女納於宮中以韋妃有寵遂廢其后高氏秦州屬鞏昌府

無厭足徧經遊球場酒肆

不羞慚輕出入柳戶花門

衍遊縱無度嘗列錦步障擊毬其中往往遠適而人不知遍遊近郡名山或樂飲繒山涉旬不下山前穿渠乘船夜歸令宮女秉燭炬千餘居前船却立照之水面如畫每好微行酒肆娼家無所不到繒山蜀主結繒為山為宮殿樓閣於上或為風雨所敗則更易以新者

蓮花冠道士妝雲霞畫服

後宮皆戴金蓮花冠衣道士服酒酣免冠其髻髻然更施朱粉號醉粧嘗與太后太妃遊青城山宮人衣服皆畫雲霞望之若仙衍自作甘州曲述其仙狀自歌而使宮人皆和之

危腦帽珠翠幌狎客酣淫

王氏晚年俗競為小帽僅覆其頂俛首即墮謂之危腦帽衍禁之衍好戴大帽又好裹尖巾其狀如錐唐莊宗遣李嚴聘蜀衍與俱朝上清蜀都士庶簾帷珠翠夾道不絕衍以韓昭滿在迎顧士珣等為狎客陪侍遊宴與宮女裸坐或為豔歌相倡和褻慢無所不至

宣華苑醉重陽嘉王墮淚

怡神亭翫春景宰相憂心

衍起宣華苑苑有重光太清諸殿清和迎仙宮降貞蓬萊丹霞亭嘗以重陽宴近臣於宣華殿酒酣嘉王宗壽乘間極言社稷將危流涕不已韓昭曰嘉王酒悲爾諸狎客共以慢言譏嘲之誼然而罷又作怡神亭為諸狎客婦人酣飲之所每宴近臣酒酣君臣及宮人皆脫冠露髻喧譁自恣知制誥李龜禎諫曰君臣沉湎不憂國政臣恐啓北敵之謀不聽嘉州名今嘉定州

李存勗大軍來哀號請罪

殺臣僚獻首級奉表軍門

唐莊宗遣魏王繼岌與郭崇韜伐蜀時衍方幸秦州至縣谷而唐師入境衍始還唐師所至州縣皆迎降衍留王宗弼守縣谷遣王宗勳等率兵拒唐宗弼與宗勳等合謀送款於唐衍還至成都襍宮人作回鶻隊以入明日御文明殿與其羣臣相對涕泣而宗弼亦自縣谷馳歸登大元門收成都尹韓昭官者宋光嗣景潤澄歐陽晃等殺之函首送於繼岌衍即上表乞降宗弼遷衍於西宮繼岌至成都衍輿觀出降

兩輩兒氣昂昂二十五載

建衍父子自太順二年入成都為西川節度使至後唐同光三年國除凡二十五年

滿門親秦川驛做了冤魂

唐莊宗名衍入洛陽行率其宗族臣僚將佐家族數千人以東行至秦川驛唐伶人景進曰王衍族黨不少恐其為變不若除之乃遣宦者向延嗣齎敕誅之敕曰王衍一行並從殺戮張居翰覆視楷去行字改為家字由是衍族滅而免者殆千餘人

後蜀主孟知祥西川節度

孟知祥邢州龍岡人唐莊宗時為北京留守唐遣郭崇韜伐蜀崇韜曰臣等平蜀陛下擇帥以守西川無如孟知祥為節度使

唐莊宗親委任叛斬監軍

知祥馳至京師莊宗盛供帳多出內府珍奇以宴勞之酒酣指以示知祥曰蜀土之富無異於此以卿親

賢故以相付及莊宗被弑明宗立悉誅宦者罷諸道監軍初知祥鎮蜀莊宗以宦者焦彥賓為監軍時彥賓已罷而唐樞密使安重誨疑知祥有異志復以客省使李嚴為監軍初莊宗使嚴聘於蜀主衍歸獻策伐衍蜀遂平至是知祥怒曰焦彥賓以例罷而諸道皆廢監軍獨吾軍有之是嚴欲以蜀再為功也嚴至成都知祥責嚴曰今諸方鎮已罷監軍公何得來此目客將王彥銖執嚴斬之

殺董璋併東川稱王墨制

東川節度使董璋帥兵襲西川知祥遣趙廷隱張公鐸拒之知祥自將趣漢州廷隱陳於雞蹤橋公鐸陳於其後知祥登高冢督戰廷隱三戰不利知祥懼以馬箠指後陳公鐸大呼而進東川兵大敗璋與數騎遁去知祥追至赤水而還命廷隱攻梓州璋至梓州其將王暉帥兵三百大謀而入璋登城呼指揮使潘稠使討亂兵稠即斬璋首以授暉暉舉城迎降知祥遂併有東川表請行墨制補兩川節度使以下官唐明宗許之以為蜀王漢州屬成都府赤水在成都府簡縣治南一名絳水

明宗朝建國號僭號居尊

唐明宗崩閔帝立知祥遂僭號稱帝國號蜀改元明德按朝當作崩

子孟昶嗣其宗奢淫失政

知祥卒子昶嗣位昶幸晉漢之際中國多故據險一方君臣務為奢淫蜀政寢衰

寢房中穢污器七寶裝成

昶寢房溺器皆以七寶裝之後宋滅蜀宋太祖見溺器命碎之曰以七寶飾此當以何器貯食所為如此不亡何待

伊審徵王昭遠貪邪用事

王昭遠幼以僧童從其師入府知祥愛其敏慧令給事昶左右至是以昭遠知樞密院事委以機務府庫金帛恣其取與不復會計伊審徵知祥之甥少與昶親狎亦令知樞密院事貪侈回邪與昭遠相表裏

李太后良言勸不肯從親

昶母李太后以典兵者多非其人謂昶曰先帝平二蜀諸將非有大功無得典兵今王昭遠出於廝養伊

審徵趙崇韜等皆膏粱乳臭子素不習兵徒以舊恩寘於人上一日疆場有事安能禦大敵乎以吾觀之高彥儔太原舊人終不負汝其餘無足任者昶不從

宋朝將王全斌長驅席捲

昶遣大程官孫遇以蠟丸書間行東漢約出師攻宋遇為邊吏所得宋太祖曰我伐蜀有名矣遣忠武節度使王全斌與劉光乂等討之昶使王昭遠等拒之昭遠攘臂言曰吾此行非止克敵取中原如反掌耳手執鐵如意指揮軍事自比諸葛亮全斌至三泉擊昭遠敗之昭遠焚吉拍江浮橋退守劍門全斌遣偏將史延德分兵出來蘇北擊劍門與全斌夾攻之昭遠被擒全斌等遂長驅直入所向無前劍門關名在保寧府劍州北

高彥儔盡臣節死守焚身

劉光乂攻夔州夔州守將高彥儔戰敗閉牙城拒守判官羅濟勸其走彥儔曰吾昔不能守秦川今又奔北雖人主不殺我何面目見蜀人乎又勸其降彥儔亦不許歸第整衣冠望西北再拜自焚死

棄老將石頽言無能堅壁

曲躬身率子弟做了降臣

四十載錦官城三軍解甲

時蜀兵所在潰降昶問計於左右老將石頽曰東兵遠來勢不能久宜聚兵堅守以敵之昶歎曰吾與先君以溫衣美食養士四十年一旦臨敵不能為吾東向放一箭雖欲堅壁誰與吾守者耶乃命李昊草表以降後舉族至泮率子弟素服待罪闕下宋封昶為秦國公 錦官城在萬里橋因蜀有錦官故名猶合浦之珠官也又昶於城上盡種芙蓉謂左右曰真錦城也

不男兒貽笑與花蕊夫人

花蕊夫人費氏有才色入蜀宮后主昶嬖之及昶降夫人有四十萬人齊解甲更無一個是男兒之句又一書云前蜀小徐妃號花蕊夫人即翊聖太妃嘗遊青城山題詩後被害於秦川驛後蜀花蕊夫人亦姓徐嘗效王建作宮詞百首

北燕主劉仁恭窟頭起手

劉仁恭深州樂壽人事幽州李可舉能穴地為道以攻城軍中號劉窟頭後以功為幽州將戍蔚州蔚州戍兵作亂擁仁恭為主攻幽州戰敗仁恭奔降晉主李克用克用平幽州請命於唐拜盧龍節度使

好驕奢貪且暴無比凶人

築宮館大安山勞民害眾

聚紅妝藏外道鍊藥銷兵

仁恭幸世多故驕奢貪暴以大安山四面懸絕築宮館於其上窮極奢麗選燕美女實其中又與道士煉丹藥冀可不死令燕人用堽土為錢悉斂銅錢鑿山藏之已而殺其工以滅口後人皆莫知其處 大安山在順天府房山縣北

不孝子劉守光私通愛寵

仁恭愛妾羅氏其子守光烝之仁恭怒答守光逐之

害胞兄囚親父梟獍其心

梁太祖遣李思安擊仁恭直抵城下仁恭在大安山城幾不守守光自外將兵以入擊走思安乃自稱盧龍節度使遣部將李喜攻大安擄仁恭以歸囚於別室守光兄義昌節度使守文聞父被囚乃集將士大哭曰不意吾家生此梟獍誓與諸君討之乃率兵至盧臺為守光所敗進戰玉田又敗乃乞兵於契丹合契丹吐谷渾之眾戰於雞蘇守光兵敗守文單馬立於陣前泣謂其眾曰勿殺吾弟守光將元行欽識之直前擒之諸兵皆潰守光又囚之別室使人殺之義昌軍名今河間府滄州盧臺故城在河間府青縣衛河西南岸周廻三十二里玉田縣名屬順天府薊州

黥手面定霸都二十餘萬

調境內男子十五以上七十以下悉自備兵糧詣行營文其面曰定霸都士人則文其臂曰一心事主得二十萬人按此乃仁恭事今作守光事疑悞

諸征鎮冊尚父意氣驕盈

守光使人諷鎮定求尊已為尚父趙王鎔以告晉王存勗存勗怒欲伐之諸將皆曰是為惡極矣行當族滅不若陽為推尊以稔之乃與鎔及義武王處直昭義李嗣昭振武周德威天德朱瑤六節度使其奉冊推守光為尚書令尚父守光益驕義武今真定府定州昭義今潞州振武今大同府天德亦屬大同

既得志受王封心無厭足

殺諫臣稱皇帝鬧了三春

初梁太祖以守光為燕王至是表曰晉王等推臣不若陛下授臣河北都統則并州不足平矣梁亦知其狂愚拜守光河北採訪使有司白守光尚父受冊用唐冊太尉禮儀守光問何無郊天改元之事有司曰此天子之禮尚父人臣耳守光怒曰我地方二千里帶甲三十萬獨不能帝一方乎乃命趣具即帝位之儀械梁晉使者於獄置斧鑕於庭曰敢諫者死孫鶴進曰今日之事不敢不諫守光怒令軍士割而啖之遂自稱大燕皇帝凡三年而亡

未郊天存勗來生擒父子

晉遣周德威會鎮定之兵以攻燕自祁溝入其檀涿武順諸州皆迎降守光被圍經年屢戰常敗乃遣客將王遵化致書請和語甚卑哀德威曰大燕皇帝尚未郊天何唯伏如是耶予受命討有罪者結盟繼好非所聞也守光益窘登城呼德威曰俟晉王至吾則開門泥首聽命晉王單騎抵城下問將如何守光曰今日狙上肉耳惟王所裁守光有嬖者李喜勸其勿降是夕小喜踰城降具言城中力竭晉督諸軍克之擒劉仁恭守光帥妻子亡去將奔滄洲迷失道為人所擒送晉軍晉王執其父子以歸祁溝今易州涑水縣岐溝鎮是

一家兒都做了血死猖神

晉王至晉陽仁恭父子曳以練紆獻於太廟自臨斬劉守光守光呼曰教守光不降者李喜也小喜瞋目曰囚父弑兄烝其骨肉亦小喜教爾耶晉王怒先斬小喜守光乞哀二婦李氏祝氏罵曰事已至此生復何為願先死乃俱死械仁恭至雁門刺其心血以祭先王墓然後斬之

南漢主本梁臣姓劉名隱

劉隱其相安仁上蔡人後徙閩中商賈南海因家焉梁太祖特拜清海節度使乾化中進封南海王清海軍名今廣東廣州

弟劉巖有具相據廣稱尊

巖隱之弟巖母段氏初生巖於外舍嫡母韋氏素妬聞之怒拔劍而出命持巖至將斬之及見而悸劍輒墮地良久曰此非常兒也及長身長七尺垂手過膝隱鎮南海巖為副使隱卒巖代立梁末帝悉以隱官爵授巖巖封南海王後巖稱帝於廣州國號越尋改號漢

白龍現造奇文龍天作龔

巖更名涉白龍見南宮三清殿改元白龍又更名龔以應龍見之祥有胡僧言識書滅劉氏者龔也乃採周易飛龍在天之義為龔字音儼以名焉

自矜誇窮奢侈寶殿珠宮

龔好奢侈悉聚南海珍寶凡宮殿悉以金銀珠翠為飾窮極奢麗又性好矜誇嶺北商賈至南海者多召

之使升宮殿示以珠玉之富

心慘酷恣淫刑蛇牢水獄

龔用刑慘酷有灌鼻割舌支解剝剔炮炙烹蒸之法或懸毒蛇水中以罪人投之謂之水獄

縱頑民沿海道擄掠商人

縱衛士入海掠商人金帛以恣其奢侈其後子孫皆效之

用宦者掌朝綱扶持後嗣

恐朝臣難倚靠各顧兒孫

龔末年尤猜忌以朝臣皆自有其家室各顧子孫不能盡忠於後嗣惟宦者親近可任遂專委政於宦者由是宦者大盛

子劉玠懦無能遭逢乃弟

劉弘熙乘酒醉拉殺宮門

玠初名弘度龔卒子弘度立更名玠以弟晉王弘熙輔政玠驕奢不親政事常猜諸弟弘熙欲圖之乃盛飾聲妓娛悅其意玠好手博弘熙令指揮使陳道祥引力士劉思潮譚令裡林少疆等五人習手博以獻玠宴長春宮以閱之至夕大醉弘熙使道祥思潮等掖玠至寢門因拉殺之

既殺兄又殺弟劉晟自改

弘熙既弑玠而自立乃更名晟國中議論詢弟循王弘杲請斬劉思潮等以謝中外不從思潮等聞之諧弘杲謀反晟令使者夜召弘杲弘杲知不免乃留使者入具沐浴詣佛前祝曰後世當生民家以免屠害因涕泣與家人訣別然後赴召至則殺之

把宗男都殺盡納女宣淫

晟殺弟越王弘昌鎮王弘澤及齊王弘弼等八人盡殺其男子納其女充於庭

生地獄活陰司刀山劍樹

晟設鑊湯鐵牀剝剔刀山劍樹等刑號曰生地獄又或令罪人關虎抵象其刑不一

女侍中居左右進退公卿

以宮人盧瓊仙黃瓊芝為女侍中朝廷冠帶參決政事宗室勳舊誅戮殆盡惟與宦官林延遇等內外用事

勢將衰長歎息一身難保

晟聞周世宗平江北遣使入貢為湖南所隔晟憂形於色又嘗自言知星未年月食牛女間出書占之歎曰吾當之矣因為長夜之飲曰吾身得免幸矣何暇慮後世哉

再相傳其子銀一樣凶人

晟卒子銀立宦官陳延壽曰先帝所以得傳陛下者由盡殺羣弟也銀於是亦殺其弟桂王璇興等

求仕者下蠶室纔方任用

銀任用宦官凡羣臣有才能及進士狀頭皆先下蠶室然後得進亦有自宮以求進者由是貴顯用事之人盡皆宦者謂士人為門外人不得預事

起疑心下毒酒鳩殺朝臣

錄精忌臣下凡意所稍疑者多以鳩酒毒殺之

樊胡子假玉皇帳宣禍福

陳延壽引女巫樊胡子自言玉皇降胡子身銀於內殿設帳帷陳寶貝胡子冠遠遊冠衣紫霞裾坐帳中宣禍福呼銀為太子皇帝國事皆決於胡子宦者龔澄樞等爭附之胡子乃為銀言澄樞等皆天上使來輔太子有罪不可問銀皆信之

龔澄樞專國政將帥離心

以玉清宮使龔澄樞為內太師軍國之事咸取決焉澄樞重斂苛刑肆為殺戮由是人不自保將帥離心

宋太祖憫窮民興兵救命

初宋太祖獲南漢內侍韓延業具言其主奢淫苛虐太祖驚曰吾當救此一方民命南唐主煜為書諭銀降銀囚煜使者乃遣潭州防禦使潘仁美伐之

潘仁美入城來一鼓而擒

張聞宋師至遣龔澄樞等禦之仁美師次白霞澄樞望風遁還遂克韶賀連桂四州又進平英雄二州張將潘崇徽先降張遑迫遣其弟祥王保興詣仁美降不能駐當自還也乃盡焚其府庫宮殿銀以海船十餘悉載珍寶燬御將入海宦官樂範竊其舟以逃歸仁美次白田張出降送至汴宋封為恩赦侯

四代兒不仁君南蠻惡物

南漢自龔至張凡四主

五十年磨滅了多少生靈

龔自梁貞明三年稱帝至宋開寶四年國滅凡五十五年

北漢主乃劉崇漢高親弟

劉崇漢高祖知遠之弟知遠即位崇為太原尹北京留守及郭威篡漢崇遂稱帝謂之北漢

并河東節度使子號湘陰

隱帝時崇為河東節度使隱帝被弒崇欲起兵南向聞迎立其子武寧節度使贊乃止曰吾兒為帝吾又何求後郭威廢贊為湘陰公而自立

周郭威兩弒君懷讐結憾

郭威弒君結憾註見本卷死荒村弒劉贊攻北漢句下

據太原稱漢帝要併乾坤

崇聞湘陰公被弒乃慟哭遂即位於太原國仍號漢凡據并汾忻代等十二州即遣其子承鈞將兵伐周

倚仗着大遼家兵威國勢

契丹主聞崇立使其招討使潘聿燃遺承鈞書崇使承鈞復書言本朝淪亡欲循晉室故事求援北朝契丹主許之崇遂致書稱姪如契丹乞兵

動干戈與士馬虎鬪龍爭

契丹遣蕭禹將鐵馬萬騎及奚契丹五萬崇亦自將二萬會兵伐周

高平敗乘黃騮雕窠走免

高平之戰註見本卷斬樊能句下初契丹主以黃騮報聘至是戰於高平大敗崇獨乘黃騮自雕窠嶺間道馳去夜失道山谷間得村民為鄉道誤趨平陽得他道以歸

金飾廐三品料自在將軍

崇歸為黃騮治廐飾以金銀食以三品料號自在將軍

歸天去子乘家追稱世祖

崇卒子承鈞立是為孝和帝始立七廟於顯聖宮追稱崇為世祖

孝和帝善維持保土安民

承鈞性孝謹既嗣立勤於為政愛民禮士境內粗安

尊遼主自稱男皆因國小

僮人呼兒皇帝不敢高聲

承鈞遣人奉表於契丹自稱男契丹答詔呼之為兒皇帝

用僧道理朝綱因循歲月

初燕主劉守光死其子繼顯削髮為浮屠後居五台山繼顯能講華嚴經四方供施多積蓄以佐國用承鈞拜為鴻臚卿累官至太師中書令棣州人郭無為好學多聞善談辨嘗衣褐為道士隱抱腹山承鈞內樞密使段常識之薦其材承鈞召之遂以為相

美言詞尊趙宋暫免交征

宋太祖嘗因界上謀者謂承鈞曰君家與周氏為世讐宜其不屈今我與汝無所間何為因此一方人若有志於中國宜下太行以決勝負承鈞遣謀者復命曰河東土地甲兵不足當中國之十一然承鈞家世非叛者區區守此蓋懼漢世之不血食也太祖哀其言終其世不加兵

無後嗣靠誰人承家繼統

外甥兒收拾做義子螟蛉

營卒薛釗初妻崇女生子繼恩釗死崇女適何氏生子繼元何氏與崇女俱卒二子幼孤崇以承鈞無子命養二甥為子

薛氏子名繼恩登朝兩月

侯霸榮行篡弒命掩泉扃

承鈞卒養子繼恩立繼恩乃薛氏子而沙陀劉氏之祚亡繼恩在位甫兩月置酒會諸大臣宗子飲罷卧閣中供奉官侯霸榮率十餘人挺刃入閣反扃其門繼恩驚起繞屏環走霸榮以刃搵其胸殺之

郭無為用朝典立誅奸黨

郭無為遣人以梯登屋入殺霸榮并誅其黨初承鈞語無為曰繼恩非濟世才恐不能了我家事奈何無為不對繼恩怨無為不助已及立欲逐之而未發故霸榮之弒人皆以為無為之謀亟殺霸榮以滅其口

何繼元承乃位宋主來征

郭無為迎繼恩同母弟何繼元嗣位宋太宗以潘美為北路都招討使帥崔彥進等分道伐漢

烏紗帽縞素衣城臺納表

潘美等屢敗漢兵築長連城以圍太原漢外援不至餉道又絕城中大懼宋太宗自至太原督戰益急繼元乃夜遣客省使李勲奉表乞降太宗許之因至城北張樂宴從臣於城臺明日繼元率官屬縞衣紗帽待罪臺下太宗釋之召使升臺

受官封一塊土老在彭城

宋以繼元為右衛上將軍封彭城郡公至宋太宗淳化二年卒

按前史閱興亡浮漚起滅

是和非長共短記載分明

有德行好君王無多幾位

惡神煞無道主禍亂縱橫

救濟生靈須聖主

保全民命靠英雄

何時一點天瓢水

洗盡中原戰血紅

千古傷心舊事一場談笑春風殘篇斷簡記英雄總爲
功名引動 箇箇轟轟烈烈人人擾擾匆匆榮華富貴
轉頭空恰似南柯一夢 西江月

功名到底成何用

夜宴終須有散場

